

四庫全書

史部

欽定四庫全書

史部
雲南通志卷十九

詳校官給事中臣李臺

刑部郎中臣許永椿覆勘

總校官知縣臣楊懋珩

校對官學錄臣陳木

謄錄監生臣羅允文

欽定四庫全書

雲南通志卷十九

名宦

附忠烈

粵自疆域肇建設官分理職任有大小權位有重
輕莫非上佐元首下育黎庶雖越在萬里一言一
念悉稟闕廷也雖遠涖邊氓用休用威視同赤子
也士大夫明於致身敬事之義內既厥心外宣乃
力方隅未靖則招徠綏輯以懷柔之民夷未和則

生養教訓以固結之至政績有成令譽鴻聲一歸
之君父而已無與焉斯真不求名而名足永垂者
哉歷代以來紀在誌乘班然可考世遠風微並存
而錄之未能悉核也

國家壽考作人時雍化美恭逢

聖明繼體崇賡颺之烈隆師濟之風灼見克知懋官懋
賞用是人思自效各廸有功自此以往爰舍甘棠
畏壘俎豆將不勝書茲特登其已歿而留祀郡邑

卓有可稱者至於取義成仁致命遂志或忠憤獨
激蹈白刃以捐生或名節共完率合門而殉難爰
表干雲之概用垂立懦之風志名宦忠烈附焉

總部

漢

陳立

字少遷四川臨邛人故金城司馬初為連然
長不韋令諸蠻畏之河平間夜郎王興等治

兵相攻遣使和解不從刻木象漢吏立道旁射之
杜欽說大將軍王鳳曰漢使和解諸蠻王侯王侯
受詔已復相攻輕易漢使不憚國威其效可見恐
議者復守和解彼得收獵其衆申固其謀黨助衆

多雖有孫吳賁育智勇無所施屯田守之費不可
量宜因其罪惡未成選任職太守入誅其王侯尤
不軌者鳳然之因爲立為祥牂太守立至祥牂斬
夜郎王興諸夷震恐降立選郡興妻父翁指與興
子邪務收餘兵迫脅旁二十二邑反立與郡尉長
史分將攻之翁指據阬為壘立使奇兵絕饋道縱
反間以誘其衆都尉萬年曰兵久不決費不可供
引兵獨進敗走趨立營立怒叱戲下令格之都尉
復還戰立引兵救之時天大旱立攻
絕其水道諸夷共斬翁指持首出降

後漢

文

齊

廣漢人西漢末為益州太守造陂池通灌溉
埜田二千餘頃率厲兵馬修障塞降集羣夷

甚得其和及公孫述據蜀齊阻險固守述拘其妻
子許以封侯齊不降聞光武即位乃聞道遣使自

聞蜀平徵為鎮遠將軍封成義侯道卒詔郡人立廟祀之

張

翕

巴郡人永平間為越嵩太守政化清平在郡十七年卒人慕之如喪父母

王

阜

蜀郡人元和間為益州太守政化尤異有神馬四出滇池中甘露降白鳥見始興學校漸

遷其俗阜
一作追

張

喬

籍貫失考安帝初為益州刺史元初四年越蜀夷封離叛遣中郎將尹就討之敗績詔以兵屬喬五年永昌等三郡夷叛應離眾至十餘萬破二十餘縣焚掠百姓千里無人喬遣從事楊竦擊離等大破之離乞降三十六種皆附喬因奏長吏姦滑激亂者九十人皆減死論諸夷遂定

楊

竦

籍貫失考為益州從事以刺史張喬命討封離竦偵知賊盛未遽進先以詔書示三郡密

徵死士懸重賞與離大戰破之斬首三萬餘級獲生口千五百資財四千餘萬悉犒軍士離等惶怖斬其渠帥乞降於是三十六種蠻悉來款附尋病創卒喬哀之上其功勒銘繪像焉

李

顯

巴郡人初為太尉掾熹平五年益州蠻叛執太守雍陟御史朱龜討之不克朝議欲棄之

顯建策討伐乃拜顯益州太守遂與刺史龐芝發板楯蠻擊破之獲雍陟歸諸蠻平

龐

芝

籍貫失考益州刺史熹平五年與李顯同討叛夷

景

毅

廣漢人李顯卒後諸蠻復叛以毅為太守復討定之毅初到郡斛米萬錢及至漸以仁恩

未期月米價減至數千錢

張亮則

字元修南鄭人牂牁太守威著南土永昌越雋夷欲叛畏亮則乃止

三國漢

董

和

字幼宰南郡枝江人漢末率宗族西遷劉璋以為牛鞞江原長時蜀土殷富俗尚奢靡和躬率以儉所在皆化後遷益州太守其清約如前與諸蠻從事務推誠心南土愛信先主定蜀徵為掌軍中郎將署左將軍大司馬府事

費

詩

字公舉犍為人建安末為綿竹令先主既定成都領益州牧以詩為督軍從事尋拜祥犍太守還為州前部司馬先主稱尊號詩上疏曰殿下憤曹氏篡竊糾眾討賊今大敵未克而先自立恐人心疑惑昔高祖與楚約先入關者王及子嬰就降尚懷推讓今不法高祖愚臣不為殿下取也左遷永昌

從事

諸葛亮

琅琊人建興元年領益州牧六月益州耆帥

諸夷

雍闓殺太守求附於吳又使郡人孟獲誘煽

軍馬

諤進曰用兵之道攻心為上攻城為下心戰

為上

兵戰為下願公服其心而已亮納之比至南

中所

至戰捷由越嵩入斬闓等獲收餘衆拒亮亮

募生

致之既擒使觀營陣復縱之更戰七縱七擒

猶遣

獲獲不去曰公天威也南人不復反矣遂入

滇池

益州永昌牂牁越嵩四郡皆平亮即其渠率

而用

之或以為疑亮曰若留外人則當留兵兵留

則無

所食一不易也加夷新傷破父兄死喪留外

人而

無兵必成禍害二不易也又夷累有廢殺之

罪自

嫌蒙重若留外人終不相信三不易也今吾

欲使

不留兵不運糧而綱紀粗定夷漢粗安故耳

馬忠

字德信閬中人少為郡吏獻帝建安末舉孝廉除漢昌長後主建興元年丞相亮開府以

忠為門下督三年亮南征拜為牂牁太守承朱褒
叛亂之後撫育郵理甚有威惠八年召為丞相叅
軍副長史蔣琬署留府事又領州治中從事九年督
將軍張嶷等討汶山郡叛羌十一年南夷豪帥劉
叟反擾亂諸郡庾隆都督張翼討之不克丞相亮
以忠代之遂斬曹平南土加忠奮威將軍封博陽亭
侯初建寧郡殺太守正昂縛太守張裔於吳故都
督常駐平彝縣至忠乃移治味縣處民夷之間又
越嵩郡亦久失土地忠率將張嶷開復舊郡由此
就加安南將軍進封彭鄉亭侯延熙五年還朝加
拜鎮南大將軍七年留成都平尚
書事後復歸南十二年卒子修嗣

張

嶷

字伯岐南充國人後主建興九年為牙門將
屬馬忠討汶山叛羌南平四郡蠻夷軌有籌

畫戰克之功十一年又從忠討劉叟戰鬪常冠軍
首遂斬叟牂牁牁興古獠種反忠令嶷領諸營往討

招降二千餘人悉傳詣漢中延熙三年除越雋太守嶷之郡以恩信誘諸蠻北邀捉馬最驍勁不承節度嶷自往討生縛其帥魏狼又解縱告諭諸蠻聞之多漸降服以功賜爵闕內侯在郡十五載屢著威績邦域安穆乞還乃徵詣成都夷民扶藪涕泣隨之朝貢者數百人

晉

李

毅

天水人廣漢主簿太康間罷寧州入益州以毅為校尉持節統兵鎮南中監五十八部明

達剛斷蠻民信服事詳師旅考

毛

孟

寧州治中惠帝末西南夷叛會刺史李毅卒孟詣京師求救不見省孟固請曰君亡親喪

幽閉窮城萬里訴哀不垂愍救既慙包胥無哭秦之感又愧梁妻乏崩城之驗存不若亡乞賜臣死

朝廷憐之乃以

王遜為刺史

王

遜

字邵伯魏興人仕郡察孝廉累遷上洛太守私牛馬在郡生駒犢者秩滿悉以付官云是

郡中所產也惠帝末西南夷叛寧州刺史李毅卒城中百餘人奉毅女固守經年永嘉四年治中毛孟詣京師求刺史乃以遜為南夷校尉寧州刺史道遇寇賊踰年乃至外逼李雄內有夷寇吏士散沒城邑邱墟遜披荒糾厲收聚離散征伐諸夷俘馘千計威行寧土遣子澄奉表勸進於元帝帝嘉之累加散騎常侍賜爵褒中縣公遜以地勢形便分改諸郡皆見施行事詳建置太寧元年李雄遣李驥等渡瀘水寇寧州遜使將軍姚崇嬰琛拒之戰於堂狼大破驥等崇追至瀘水赴水死者千餘人崇以道遠不敢渡水遜以崇不窮追也怒因諸帥執崇鞭之怒甚髮上衝冠冠為之裂夜中卒州

人復立遜中子堅行州府事詔允之諡遜曰壯姚崇一作姚岳

姚岳

明帝時寧州裨將軍太寧元年大破李驥于堂狼晉寧至今有祠祀

梁

蕭紀

南蘭陵人武帝子封武陵王大同三年為益州都督建寧越葛叛紀振旅通道撫定夷人

徐文盛

字道茂彭城人大同末持節督寧州刺史先是州在僻遠所管羣蠻不識教義貪欲財賄

劫篡相尋前後刺史莫能制文盛推心撫慰示以威德夷獠感之風俗遂改

隋

梁睿

字持德安定烏氏人開皇間為益州總管討平代王謙之亂夷獠畏服夷酋鬱震恃遠不賓

睿請以寧州朱提雲
南西爨置總管從之

梁

毗字景和安定烏氏人文帝時以直忤權貴出
為西寧州刺史在州十一年先是蠻夷酋長

皆服金冠以金多者為豪雋由此遞相陵奪每尋
干戈邊境略無寧歲毗志之後因諸酋長相率以
金遺毗毗置金生側對之慟哭而謂之曰此物飢
不可食寒不可衣汝等以此相滅不可勝數今將
此來欲殺我耶一無所納悉以還之於是蠻夷感
悟不相攻擊帝聞而善之徵為散騎常侍大理卿

唐

韋仁壽

京兆萬年人高祖時推蒿州都督府長史南
寧州納款欵朝廷歲遣使撫之率貪饕為邊患

帝素聞仁壽治理詔檢校南寧州都督寄治越嵩
歲一按行慰勞仁壽將兵五百人循西洱河開地

數千里稱詔置七州十五縣擇酋豪授以牧宰威
令簡嚴人皆安悅將還酋長泣曰天子藉公鎮撫
奈何欲去我仁壽以池壁未立為解諸蠻即相率
築城起解甫旬略具仁壽乃告以實曰吾奉詔第
撫循庸敢擅留南中父老乃悲啼祖道遣子弟隨
貢方物天子大悅仁壽請徙治南寧州詔可勅益
州給兵護送刺史實軌疾仁壽功誅言山獠
方叛未可以勤遠略遂不遣仁壽歲餘卒

爨歸王

南寧州西爨白蠻也有才略貞
觀間為南寧州都督忠於唐

趙孝祖

永徽間以左領軍將軍為郎州道行軍總管
討南寧白水蠻平之因奏勃弄以西與樛榆

洱河相接無大部長好結仇怨明年移
兵大破西南夷撫而安之其境遂定

韓思彥

字英遠鄧州人高宗時為監察御史巡察劍
南益州高贇兄弟相訟屢年不決思彥勅厨

宰飲以乳二人悟嚙肩相泣曰夷獠不識孝義公無乃以弟兄共乳而生耶乃請輟訟至西洱河誘叛蠻降之璽書褒美焉

韋臯

字城武京兆萬年人貞元初為劍南節度使兼雲南安撫使初西瀘令鄭回為南詔清平官說異牟尋歸唐而無路自致會臯至鎮有威惠招撫境上尋潛遣人求內附臯以聞乃命臯作書諭之遂決策歸唐尋請以大臣子弟質於臯臯辭固請乃令就學成都尋屢從臯破吐蕃兵事詳師旅考南詔自是

比年貢方物

李德裕

字文饒贊皇人太和三年為鄭滑節度使踰年徙劍南西川節度使蜀自南詔入寇千里殘敵德裕至建籌邊樓凡山川險要悉圖於上未踰月皆若身嘗涉歷上命修塞清溪關以斷南詔德裕

上言通南詔細路至多不可塞惟重兵鎮守可保無虞乃修甲冑器械作雄邊子弟等十一軍築仗義禦侮桑遠等城復邛峽闕徙萬州治臺登以奪蠻險舊制歲抄運內粟贍黎萬州分餉諸戎常以盛夏至苦瘴毒輦夫多死德裕命轉邛雅粟以十月為漕始先夏而至運饋者不涉炎月遠民乃安

郭

釗

太和間以兵部尚書帥劔南時南蠻攻梓州釗威兵以備遺書責蠻長王箴巔巔以杜元

頴侵擾為解因決意遣使入貢天子嘉之

元

烏蘭哈達

蒙古人世祖討南蠻諸國以哈達總督兵事自且當嶺入雲南境麼些二部蠻長咬

火脫因塔裏馬來迎降遂至金沙江合台分兵入白蠻寨罕章破其寨柵又攻阿塔刺半空和寨絕

其汲道其子阿珠迎擊寨兵退走遂并其弟鄂碩城俱拔之進取龍首闖入大理分兵取附都善闡轉攻烏蠻合刺章水城又破羅部府大酋高昇破押赤城至昆澤擒其王段智興及渠帥馬合刺昔以獻事詳師旅考出師二年平大理三十七部請悉置郡從之賜其軍銀幣授銀印加大元帥還鎮大理

博斯呼

從世祖征花馬國率兵千人結浮橋於金沙江以濟師中統初論功授益州等路宣撫使

賜金

虎符

薩達克齊沙木斯迪音

回回人世祖呼為薩達克齊而不名薩達克齊猶華言貴族也至元十一年拜

平章行省撫雲南時宗王圖固勒鎮滇感於左右具甲兵為備迪音聞之遣其子尼雅斯拉迪音先至王所

請曰天子以雲南守者非人致諸國背叛故命臣來安集之且戒以至境當即加撫循今未敢專願王遣一人來共議王聞遂罵其下曰吾幾為汝輩所誤明日遣親臣二人至迪音問以何禮見對曰吾等與尼雅斯拉迪音偕來視猶兄弟也請用子禮見皆以名馬為贄拜跪甚恭觀者大駭乃設宴陳所賜金寶飲器酒罷盡以與之二人大喜過望明日來謝語之曰二君雖為宗王親臣未有名爵不可以議國事欲各授君行省斷事官以未見王未敢擅授令一人先還稟王王大悅由是政令一聽建嘗所為十二年奏諸夷未附者多今擬宣慰司兼行元帥府事並聽行省節制又奏哈刺章雲南壞地均也而州縣皆以萬戶千戶主之宜改置令長並從之十三年以所改雲南郡縣上聞乃教民以禮作陂池以備水旱創建孔子廟購經史置學田文風稍興又相地置鎮每鎮土酋吏百夫長各一人行

者或劫掠則罪之有土吏數輩為迪音所黜至京誣其專僭數事帝顧侍臣曰迪音憂國愛民此輩之告誣也命械送迪音既至脫械諭之且與以官職皆叩頭謝誓以死報交趾叛服不常遣人諭以禍福約為兄弟交趾王大喜乞為藩臣羅槃甸叛往征之有憂色從者問故曰憂汝曹冒鋒鏑不幸以無辜死又憂汝曹劫擄平民使叛則又從而征之耳師次羅槃三日不降諸將請攻不許遣使往諭越三日又不降諸將復請攻之又不許俄而將卒有乘城進攻者遽鳴金止之召而叱曰吾奉命安撫不奉命殺戮也無主將命而擅攻法當誅命左右縛之諸將叩首請俟城下之日從事羅槃主聞之曰平章寬仁如此拒命不祥乃舉國降諸夷聞風翕然歛附夷酋每來見例有獻納悉賜從官貧民秋毫無所私為酒食勞酋長製衣冠鞵履易其卉服草履首皆感悅迪音居雲南六年卒年六十九百姓

卷哭葬鄩關北門交趾王遣使齊經致祭帝思其功詔省臣守其成規不得輒改大德元年贈咸陽王益忠惠子五人長尼雅斯拉迪音次哈克繼廣東道宣慰使都元帥次呼遜次沙木斯迪音烏瑪喇建昌路總管次瑪蘇庫雲南諸路

行中書省平章政事

尼雅斯拉迪音

沙木斯迪音子累官雲南路宣慰使都元帥至元十六年遷帥大理以軍抵金齒蒲驃

曲蠟緬國招安夷寨三百籍戶十二萬二百定租賦置郵傳立衛兵歸以馴象十二入貢十七年雲南省臣撫綏失方授尼雅斯拉迪音行中書省左丞尋陞右丞建言三事一謂雲南省規措所造金薄質易病民宜罷一謂雲南有省有宣慰司又有都元帥府近宣慰司已罷行省既兼領軍民則元帥府亦當罷一謂雲南官員子弟入質達官子弟當遣餘宜罷奏可二十一年進平章政事奏減哈喇章

冗官歲省俸金九百餘兩專人督屯田課程歲增
金五千兩二十九年卒贈中書左丞相延安王子

十二人呼避雲南行省平章

政事實迪雲南行省左丞

張立道

字顯卿陳留人至元間以王府文學從皇子
雲南王和克齊之鎮勸王務農以厚民即署

立道勸農官領屯田事元帥布呼丹毒殺和克齊
立道潛結義士十三人約共討賊刺臂血和金屑
飲之推一人走京師告變事洩呼丹囚立道將殺
之提舉張忠者於立道為族兄結壯士夜劫出共
走及布呼丹伏誅有旨詔立道等入朝帝曰汝等
為我家事甚勞苦今欲事朕乎事太子乎事安西
王乎惟意所向立道等奏願留事陛下於是賜立
道金五十兩以旌其忠十年三月領大司農事中
書以立道熟於雲南奏授大理等處巡行勸農使
佩金符其地有昆明池環五百餘里夏潦暴至必冒

城郭立道求泉源所自出役丁夫治之洩其水得壤地萬餘頃俱為良田墾甃之人蠶桑未得其法立道教之飼養滇民富庶羅羅諸蠻相率來降收其地悉為郡縣十五年除中慶路總管佩虎符又修建孔子廟置學舍教其子弟擇士之賢者為師歲時率諸生行釋菜禮人習禮讓行省平章賽音迪奏表言於朝有旨進官十七年入朝請於帝以雲南王子額森特穆爾襲王爵帝從之遂命立道為臨安廣西道宣撫使兼管軍招討使陞辭賜以弓矢會禾泥路必思反煽動諸蠻亟發兵討之拔其城邑徇金齒甸七十城越麻甸抵可滿皆下之二十二年又籍兩江僮士貴岑從殺李維屏所部戶二十五萬有奇以其籍歸有司遷臨安廣西軍民宣撫使復創廟學於建水路書清白訓於公廡以警貪墨風化大行入朝條陳十二策帝嘉納焉三十年皇曾孫蘇克繼封梁王鎮雲南廷議求舊臣可

為輔者立道遂以陝西行臺侍御史拜雲南行省
叅政卒於官著有雲南風土記六詔通說若干卷

阿 嚕

唐吉特人色爾欽部子也襲為大名路達嚕嚕
齊至元五年從雲南王征金齒諸部震服六

年再入定其租賦平火不麻等二十四砦七年改
中慶路達嚕嚕齊兼管爨軍十年平章沙木斯迪音
令阿嚕疆理永昌十一年閔中慶路版籍得隱戶
萬餘以四千戶即其地屯田十六年遷雲南諸路
宣慰使副都元帥明年復立雲南行省拜叅知政
事明年烏蒙羅佐山白水江蠻叛討平之又明年
諸王桑阿克達爾帥諸將征緬阿嚕供餉饋無乏絕
二十五年卒贈平章政事諡毅敏子嘉琿中書平
章政事請於朝贈其祖色爾欽部太師諡貞
獻加贈阿嚕太師追封魏國公改諡忠節

克 呼

西域人世居太原由譯史從沙木斯迪音經略川
陝至元十二年立雲南行省署為幕官鹽夷

欵服克呼功居多十五年分省大理會緬入寇以戰具資軍士討平之授行中書省左右司員外郎十八年平章尼雅斯拉迪音遣詣闕敷奏邊事世祖愛其才辯拜鎮西緬麓川等路宣撫司達魯噶齊兼管軍招討使成都烏蒙諸驛阻絕克呼市馬給傳往來便之俄被詔問征緬事宜奏對稱旨賜幣帛及翎根甲諸王相烏塔拉右丞太卜征緬烈率兵船為鄉導拔江頭城振旅而還復從雲南王入緬總兵三千屯鎮驃國設方略招徠其黨由是復業者衆後入覲世祖慰勞之詢以緬國始末摧僉緬中行中書事頒詔於緬宣布威德緬王遣子入貢累進雲南諸路行中書省左丞大德四年以病卒

伊克德濟

臣刺魯人至元十七年征邠端拜雲南行省叅知政事二十一年與諸王相烏塔拉

右丞太卜分道征緬造舟二百艘進攻江頭城拔之獲銳卒萬人命都元帥來世英守之圖其形勢

遣使詣闕具陳攻守之方隨遣赫德揚林招降不
報諸蠻據太公城以阨大兵復遣僧諭以禍福反
為所害遂督軍進擊破之金齒等十二城皆
降以五千兵戍之後改四川行樞密副使卒

趙世延

字子敬其先永吉特族人居雲中至元二十一年授雲南諸路提刑按察使司判官時年二

十有四會烏蠻叛白省臣以軍討之蠻兵大潰請
降推監察御史歷四川肅政廉訪大德間八百媳
婦為邊患右丞劉深往討兵敗還棄市於是右丞
阿固台當繼行世延言蠻夷宜羈縻而重煩天討
致軍旅亡失誅戮省臣藉使盡得其地何補於國
今窮兵黷武實傷聖治朝廷第當選重臣知治體
者付以邊寄兵宜寢事聞樞密院謂用兵大事不
宜以一人之言為興輟世延再疏兵竟罷後官至
中書平章政事封
魯國公諡文忠

額森布哈

蒙古克呼氏至元二十三年拜雲南行中書省平章政事時阿郎可馬丁熨夷為變

討平之遂立登雲等路府州縣六十餘所得戶二十餘萬官其部長定其貢稅邊境以寧

張萬嘉努

父札呼岱為都總管萬戶歿於軍萬嘉努從征討有功授以父官至元間進副都元

帥將四川湖南兵征哈喇章時雲南惡昌多興羅羅諸夷皆叛殺掠使者州郡莫能制遂以其兵討之民為之立祠二十年從征緬戰死雲南王命子保童將其軍從征入太公城有功襲副都元帥

多爾濟

字道明西夏寧州人世祖時為雲南廉訪副使會諸蠻叛僚佐悉稱故去乃獨居守又八

月省臣大懼歸符印欲遁多爾濟白於梁王得檄而後出及為雲南廉訪使會行省丞相特們德爾羅織安撫使巴哈喇卜丹將置極刑爭曰生殺之權繫於天子方面之臣而專殺意將何為安撫獲免

夔夷與蠻相仇殺省臣受夔賂誣奏蠻叛
殺良民亟奏劾廢之年六十二卒於官

蒙古岱

邦丹人世祖時襲父職為隨路新軍總管從
攻羅必甸至雲南詔以衆入緬迎雲南王金

齒諸蠻伏險為備帶奮擊破之凡十餘戰至緬境
開金齒道奉王以歸遷副都元帥從諸王阿勒台征
交趾至白鶴江接戰奪其戰艦又從雲南王攻羅
必甸破之二十九年入覲成宗即位授烏撒宣慰
使遷大理金齒都元帥六年討平烏撒羅羅斯賜
鈔九年平羅雄叛賊進驃騎衛上將軍雲南行中
書省左丞宣慰使都元帥卒於軍至大四年贈
龍虎衛上將軍平章政事追封濮國公諡威愍

程思廉

字介甫東勝州人至元二十六年為雲南行
御史臺中丞始至蠻夷部長來賀詞若避而

意甚倨思廉奉宣德意示以禍福諸蠻皆懼服雲
南舊有學校而禮教不興思廉力振起之始有從

學問
禮者

劉正

字清卿清州人大德元年為雲南行中書省左丞時右丞蒙古圖魯默色請征緬正以為

不可師果無功雲南民歲輸金銀所差官必先重賂省臣乃得遣及至徵收之數每十加二而拆閱之數又如之其迎送饋贖亦如納官之數正疏革其弊給官稱俾土官自輸納夷民使之

呼遜

沙木斯迪音三子大德間改雲南行省右丞既至條諸不便事言於宗王王不可呼遜與左

丞劉正馳還京師有旨令宗王協力施行由是一切病民之政悉罷豪民避徭役往往投充王府宿衛有司不勝供給呼遜按朝廷原額所無者悉籍為民減其宿衛三分之一馬龍首謀叛陰與外賊通事覺宗王為左右所蔽釋不問呼遜與劉正反覆研鞫反狀盡得竟斬之軍糧支給地里遠近不

同吏緣為姦呼遜籍軍戶姓名及倉廩處所為更番支給吏姦始除先是沙木斯迪音建孔子廟撥田五頃以供祭祀沙木斯迪音卒田為大德寺所有呼遜按廟學舊籍歸之乃復下諸郡立廟學選文學為之師文風大興王府畜馬多悉縱之郊敗民禾稼而牧人在民家宿食民無寧居呼遜度地置草場構屋使為牧所民得以安廣南首沙奴梗化呼遜遣使誘至待之以禮留數月不遣首請還呼遜曰汝欲還可納印來首不得已齎印至呼遜置酒宴勞諷令偕印入覲帝大悅大德五年緬首負固忽辛遣人諭之曰我老賽音迪延齊平章子也惟先訓是遵凡官府於汝國所不便事當為汝更之緬首聞遂與使者偕來獻白象一既入帝賜緬首以世子之號烏蠻等租賦歲煩軍徵索呼遜以利害榜諭諸蠻不遣一卒而租賦咸足俄有為飛語惑宗王者呼遜馳報朝廷遣使臨問凡造言之徒悉誅之呼

進借使者還觀至大三年卒贈雍國公諡忠簡子
二人伯杭中慶路達魯噶齊庫哩勒湖南宣慰使

李京

字景山河間人大德五年由樞密宣慰烏蠻
尋陞烏撒等道宣慰副使兼管萬戶時烏蠻

等地隸雲南行省京方下車會羣蠻不靖按行調
發餽給鎮撫周履滇境後悉其見聞為誌略四卷

以進翰林學士虞
集元明善序之

支渭興

字文舉郟陽人文宗至順庚午進士為雲南
行省考試官道梗留雲南屢進宣慰副都元

帥有惠政能文章
所著詩集行於世

楊祚

字慶之文宗時廉訪僉事有才
略所至以興學化人為先務

薩木丹巴勒

字山堂號飛山子西夏人至正間行省雲
南右丞多善政深得軍民之心有遺愛焉

張

瑾

字君錫，號玉溪，河南人。至正間，為雲南廉訪

副使，興學勸農，鋤強旌善，常行部至澱江，辦
釋禁獄五十餘人，剖決冗
繁三百餘事，人皆頌之。

明

沐英

沐晟

沐昂

以上事實俱詳封建

梅思祖

江南人，洪武初，雲南既平，命掌布政使司事，善於撫輯，軍民安之。

陳迪

字景道，江南宣城人，幼侗儻，有志操，洪武初，任寧國府學訓導，歷陞雲南布政使，時曲靖

烏蒙等蠻猖獗迪率兵討之

捷開賜金幣陞禮部尚書

張

統

字昭季陝西富平人洪武初平雲南以統為左叅政陞左布政使几貢賦法令壇祠公署

一切典禮皆所規定夷民悅服治行為天下第一特令吏部勿考賜蠶書褒勞歷任十七年後陞吏

部尚

書

王

俊

字大用江南合肥人洪武五年任雲南前衛指揮使二十二年陞都指揮同知調廣南衛

適儂真佑叛帥眾攻之傾其穴擒真佑以獻斬首數千級獲輜畜無算築城設衛而還永樂初以入

賀陞都指揮使賜文綺犀帶在任

三十餘年戎事無巨細多所綜理

陳

遜

福建浦城人永樂間任雲南左叅政陞右布政使博學有志操卒於官無以為殮都督沐

昂經理其

表歸之

鄭進善

江南婺源人永樂間巡按雲南風裁峻整奸貪膽落婦人童豎知其威名

周新

廣東南海人先任御史慷慨敢言人目之曰冷面寒鐵永樂間歷雲南按察使執法公平

不畏強禦有疑獄剖析立決尋改浙江異政日著以捕治錦衣紀綱之黨千戶某為綱所誣奏逮至京抗陳綱罪不少屈上怒殺之

周樂

江西吉水人永樂間任按察副使以清操著卒於官篋中惟經史數帙殞殮皆寮友為之

辨

周彥奇

江西吉水人永樂間任僉事麓川緬甸仇殺彥奇單騎深入宣布國威諭以禍福各夷俛

首而服

遂解去

張

雄

江南溧陽人永樂間任雲南都指揮僉事善撫士卒征交趾多立奇功後平鐵索蠻卒於

軍

王

善

字思舜福建候官人宣德間任叅議教大不苛麓川叛善進兵金齒值歲歉衆議和雅善曰兩者皆病民乃蠲僧寺徭役命出粟數萬石饑民賴之永寧鹽井土蠻爭地讎殺善為剖析俱帖服

楊

寧

浙江錢塘人正統間麓川反寧以刑部郎往諭後從王驥有功陞雲南巡撫及麓川平晉刑部侍郎叅理軍務寧有才略善撫軍民邊境賴之以安

譙

明

四川涪州人正統間巡按雲南剛明廉介雪冤抑之獄撫木邦之夷窮簷獲庇遐徽安全

馮

郁

浙江安吉人正統間任楚雄知府時征麓川師經楚雄郁調度有方緩急不失後委總督

糧儲陞本省布政使司叅政

賴

巽

江西人正統間任按察使廉公有威執法不撓官吏敬憚卒於官

鄭

顯

浙江錢塘人正統間任按察副使尋陞巡撫練達嚴肅政教大行尤善屬文

李

鉉

字大用山東夏津人征麓川有功陞雲南都指揮僉事分守洱海姚安公勤惠愛軍民仰

之

李

福

字天佑江西安仁人先任瀾滄衛指揮僉事從征麓川有功陞雲南都指揮僉事守備瀾

滄訓練士卒番鹽不敢犯後陞都指揮同知

張

麟

字仲翔江南鳳陽人剛介有才景泰間任都指揮僉事理屯糧區處精當詔獎其廉正老

成

何楚英

湖廣攸縣人景泰間任右布政政績著聞賜璽書褒美

沐

璘

昂長孫璘初蔭父禧千戶進襲祖指揮僉事以功陞雲南都指揮僉事景泰間進右軍都

督同知充總兵官繼斌鎮雲南修廢陞汰冗盡政務畢舉方思機之未獲也朝廷檄璘捕滅衆議深入璘曰此釜中魚安能久乎深入徒勞非計也宜以兵臨境達尺書於緬內襲外扼擒之易耳緬果以思機及妻子來獻械送京師朝廷遣使勞賚甚厚廣南寇儂應榮叔姪為亂璘遣官授以成算平

之木邦陶孟思指構兵璘復調兵平之天順元年
陞右軍都督六月卒年二十八璘為人端謹恬淡
類儒者門無私謁好讀書長吟咏尤工篆籀草書
建五華書屋羅書史其中政暇與士人討論古今
竟日不倦有古儒將
風所著詩文若干卷

沐

璚

璚弟璘卒代鎮善騎射有膂力景泰間襲錦
衣衛副千戶英宗嘉其儀容魁偉有祖父風

陞都督同知充總兵官至鎮修城壘增糧儲禮賢
興學禁貪剔蠹秣殺夷及霑益阿賽構亂悉遣兵
平之龍川木密麓川諸叛夷俱所平定成化三年
協鎮雲南明年改副總兵鎮守金騰未幾卒年四
十有二子
誠詳見後

何

純

字惟一江西新淦人成化間臨安副使適寇
盜充斥純立哨堡嚴捕逮賊皆斂跡加意學

校講經義正文
體後卒於官

王

恕

字宗貫陝西三原人清正嚴毅德行文章卓然師表成化間巡撫雲南初蒞時即懸示云

不攜僮僕單身自來意在潔己奉公豈肯縱人壞事人皆錄其辭焚香禮之在任阻貂璫寶玩禽獸之獻止侵漁田土之弊禁叅隨擾害絕文陞貿易法行中倖威振外夷歷陞吏部尚書卒諡端毅

朱

暄

字錦文江南高郵人成化間按滇興學校導水利行部至金齒修築諸葛舊堰軍民利之

溫

琮

字廷瑞四川華陽人成化間按滇中官錢能貪橫琮執法不阿能斂手避之風裁特著

樊

瑩

字廷璧浙江常山人成化間按滇繩貪獎廉精勤明敏時文人越界掠殺方議用兵瑩移

諭禍福遂納欵弘治十六年雲南晝晦七日復以南京刑部侍郎奉勅考察雲南諸吏罷遣千餘人詔

回晉尚書卒贈太

子少保諡清簡

姚

旭

字景暘江南桐城人成化間任右叅政秉性清剛臨民慈惠漢夷德之後監征蠻軍與大

璫忤及賊平議叙有索其賞許以節鉞者不聽拂衣告歸囊橐蕭然著詩文若干卷

劉

鈺

字伏和江西安福人成化間任按察使用刑明慎蠻峽畏懷時中官遣郭景取捷徑往安

南假朝命求賂安南知其詐縱之還遣兵尾後將近邊郭給其部長請入白守闕者脫歸巡撫王怒令鈺捕之郭懼赴非死逮治其黨遣人諭安南明示禍福遂退內地以安

陳

騏

字夢初廣東南海人成化間任按察司副使時鎮守太監錢能橫甚命藩臬官五日一揖

能復不出令錦衣衛指揮受禮惟騏正立不屈託病即歸能怒一日見叱之曰你這孽子食蛇慣了

故此大膽騏曰豈但蛇即豺狼虎豹也要
食能目左右欲毆之騏趨出執法如故

沐

誠

字擇善瓚長子七歲通孝經論語長襲曾祖
武襄指揮僉事嫻韜略工吟咏善草書叔父

武僖器之瓚卒軍民合辭乞誠繼鎮金騰仍進錦
衣衛都指揮使充叅將芒市諮議為邊忠率兵往

捕之卒年

二十有六

沐

詳

字擇明瓚次子以撫鎮奏授錦衣衛指揮僉
事鎮守金騰時孟密蠻思標侵擾木邦詳入

其地撫諭懇切思標悔懼歸侵疆遣使納貢成化
二十一年蒲酋阿林莽邱連結作亂詳以計縛莽
邱斬阿林遂扼聞賞費甚厚二十二年干崖作亂
討之尋以他事註議罷歸滇城卒年三十有二

賀元忠

英縣人弘治間由監察御史任金騰兵備未
久即去行李蕭然邸人聚百金於驛為贖元

忠正色節之送者號泣元忠亦泣
下而去後人目其亭曰卻金亭

何

琛

字廷獻四川成都衛人弘治間按滇卓有操
守權豪屏息時征叛蠻將官擅殺冒功琛劾

奏得旨治如
律人咸快之

張

誥

字汝欽江南華亭人弘治間巡撫雲南興水
利建倉厥儲兵食革弊政時有濟河之役給

糧不時騎兵鼓噪誥
撫諭遂定民賴以安

席

書

字文同四川遂寧人弘治十六年雲南晝晦
七日勅大臣考察雲貴諸吏書以部郎上疏
言致災之由係朝廷不係雲南在大臣不在庶官
上時事干言正德十二年任右布政使雷益土舍

搆亂贊
剽有功

趙鑾

字廷振湖廣江陵人弘治間任安普僉事訟牒旁午剖決如流土官桀驁難治者立寘於

法剝平箐寨境內又安

郭緒

字繼業河南太康人弘治間以左叅議守金

滄時思祿據金沙猖獗緒單騎往撫至孟賴

去金沙僅二舍夷咸驚曰漢官亦能至此發兵環之緒拔劍示將校期以翼日渡江祿聞遣使請命緒宣勅諭先叙其勞次伸其冤後責其叛祿伏泣稽首請歸侵地及還力節饋遺事聞陞四川叅政

王槐

字應貞山西陽曲人弘治間任金騰兵

備以嚴率下強橫斂手歷八年如一日

王一言

字行之四川內江人弘治間任臨安兵備凡城池軍旅糧餉之事井井有條軍民利病悉

之興除

姚

祥

字應龍廣東歸善人弘治間任金滄副使剛直明練所至覆覈均徭役禁私派吏以冒賄

得罪者百餘人氏甚戴之

林

俊

字待用福建莆田人弘治間以按察使駐鶴慶有元化寺以活佛惑衆歲時爭以金塗其

面後命焚之父老言不可犯恐致電損稼後令積薪伺之果電即止已而無驗遂焚之得金數百鎰悉輸於官代民償逋毀邊方淫祠三百六十餘所學宮傾壞撤其材新之並創築趙州城一時貪墨望風解綬衛官虐軍者寘之法民得休息後歷官刑部尚書諡貞肅

周

熊

字應文陝西長安人正德間按滇執法不少貸一時貪墨望風解組

張

璞

字仲美湖廣江夏人正德間按滇剛正不阿凡夷險悉皆涉歷時鎮守太監梁裕濫取物

貨民不堪命璞盡釐革之裕與鶴慶貪酷同知教
英構謀誣奏劉瑾受裕賂逮璞下獄卒後贈太僕

寺少卿

范

鏞

字鳴遠陝西臨洮人正德間巡撫雲南時大
司馬王瓊專擅不附己者輒搆以事鏞獨不

附瓊銜之時富民典史高詔先任御史以劾瓊請
官鏞薦之瓊益憾遂誣鏞擅委都司奏逮下獄欲
加重罪久之得降調嘉靖改元
詔錄用鏞已卒賜祭復其官

唐

龍

字虞佐浙江蘭谿人正德間按滇先是中瑞
錢能為鎮守有廝養錢寧者滇人也始壯性

機警為能信用指揮虛和附能門下言相人術一
見寧謂當大貴私結之寧拜和為父後和以寧寵
冒陞金齒叅將挾讎勘死平民四人燬尸以滅其
跡又強奪生員妻事發坐斬寧為和奏辨下鎮巡

覆鞠正德十一年審囚使者至寧陰囑出和獄且使楊金齋書於龍龍堂裂而還之曰和詐為耳一日使者語龍曰和獄以無尸當未減龍折之曰四人無尸蓋和燬之耳此而未減則天下酷吏紛然燬人之尸吾實不能從也縱今日富貴立至其如三尺何使者語塞即令械和送獄一時咸稱唐直指中流砥柱土官鳳朝明被奏革職陰遣使劉宣董溥戴金寶賜寧賜鎮撫求為題襲龍至巡撫首以此來會龍不可駁還其封容有為朝明者曰鳳氏持萬金伺半歲矣龍正色曰即萬金一芥耳斯言何為其人慚而去朝明復哀求寧寧令宣溥詐冒滇人保舉得內批襲知府實寧詐為之部檄下臬司時沈仁輔為按察使鞠問按治如律龍備言鳳氏及朝明罪惡與不當襲狀執奏於朝下部時驗封司郎中蘇天秀如龍原議覆奏得旨朝明仍降土舍刑威以正至今稱焉

陳察

字元習江南常熟人正德間接海每行部青驪布袍周行箚棘訪民間得失彰善癉惡監

司守令懾服墨吏望風解綬去時中官請權鑛銀以佐度支費察持不可曰此兵端也彼睹其利未睹其害竟罷議金酋挾中貴人競而嚙人察劾治如律世宗初疏言金酋騰衝地極邊徼既統以巡撫總兵等官可無事鎮守中官復行兼理因劾太監劉玉都督沐崧罪詔並罷還

王倬

字用檢江南太倉人正德間任按察使時閩鎮貪橫夷孽竊發倬匡濟之力居多且有操

持羣議不能恠

聶賢

字承之四川長壽人正德間任金滄副使以祛奸釐弊為務時大理有指揮素貪虐諂媚

貴官賢至徐勸誘使盡吐其私賄還故主然後繫之獄聞者快焉

平世用

字德中四川內江人正德間任瀾滄兵備副使築城有捍禦功卒於官

何孟春

字子元湖廣郴州人正德間任巡撫博雅冠一時政務簡靜時有石言之異禱於神石裂

蟒飛亦異政也

劉節

字介夫江西大庾人正德間任金騰兵備廉正有威臨事果斷與軍民恩義相洽時兩鎮

閩貪甚節以法繩之力為裁抑權貴側目亦不敢犯革鎮之議自此始未幾遷廣西按察使累官南

京吏部左侍郎

顧應祥

字維賢浙江長興人嘉靖間兩次撫滇博大軒豁不事苛察文章行誼一時推重滇人祠

祀與王恕何孟春並

王啓

字景昭浙江黃巖人嘉靖間以右副都御史撫滇建書院治城郭復永昌府治諸所孽畫

毅然不為

浮議所搖

鮑象賢

字復之江南歙縣人嘉靖間任副使豁達練事備兵臨安畫安南之役其功尤偉後陞兵

侍郎

蔣宗魯

字道父貴州普安人嘉靖間任巡撫精明嚴毅弭盜愛民時東川土目阿堂弒主自立患

蔓三省宗魯至陽調各兵而陰以土兵敗賊於野

馬川設奇用伏阿堂授首先任臨安兵巡平元江

那鑑之亂

民賴以安

呂光洵

字信卿浙江新昌人嘉靖間兵部尚書兼右都御史巡撫雲南時方多故竭忠宣力誅鳳

繼祖於武定斬王一新於易門殲高欽於姚安昆陽拔甸黠賊以次芟除邊境又寧

徐

瓚

字朝儀浙江永康人嘉靖間任左布政安銓之變瓚言於巡撫歐陽重謂賊敢稱亂以我

軍非敵耳不如以夷攻夷為便重從之調元江蒙化鎮沅等夷兵以漢軍佐之分統進剿瓚居中理餉立招降旗陰誘脇從又裂小旗千餘大書同心協力各保身家八字於上諭令聽撫於是歸降者衆已而鳳朝文叛與安銓合衆焚劫進圍省城瓚諭以朝廷恩威寇退請降瓚即夕遣使掣回官軍厥明合擊賊俘獲萬餘

簡釋無辜民深德焉

毛鳳韶

字瑞成湖廣麻城人嘉靖間按滇時聞鎮為害滇人苦之韶至抗疏斥罷後復以台事道

分巡金滄

尤多惠政

陳學夔

字子諧廣西宜山人嘉靖間按滇時滇民苦勞百計拯濟首懲貪婪未幾遷去

王

諍

字子孝浙江永嘉人嘉靖間按滇旌廉懲墨勦豪恤弱暢布威德為諸巡方者冠歷陞大

理丞巡撫貴州

右僉都御史

姜龍

字夢賓江南蘇州人嘉靖間任瀾滄兵備立哨設守盜賊屏息楊慎有靖蛉謠頌之

孫繼芳

字世其江西進賢人嘉靖初任提學副使剛介有識甄別無爽會有挽之者竟投劾去

唐胄

字平侯廣東瓊山人嘉靖間任金騰兵備改提督學校教士有法振拔孤寒累官兵部侍

郎

王惟賢

字士官四川中江人嘉靖間任分巡金滄僉事從歐陽南墅講學經畫多實政清郵傳酌

孫軍魁里甲滇

民有遺思焉

楊 最

字毅之四川射洪人嘉靖間任副使渾樸清
貞吏胥凜凜歷太僕卿抗言廷杖死萬厯初

贈官諡

忠節

李 樂

字仲和湖廣瀘溪人嘉靖間任金騰兵備副
使剛正不撓劾貪婪將吏四人除阿坡巨盜

軍民

稱快

王 春復

福建晉江人嘉靖間任金騰兵備副使慈恕
廉介時與諸生講學尤恤邊軍創設義倉饑

民獲

濟

張 輻

字文衡浙江山陰人嘉靖間任金騰兵備副
使廉明樂易值阿思諸夷讎殺或請征之輻

曰撫之不從用兵未晚乃遣兵往諭果從命未幾力懇致仕去

楊守魯

字允德湖廣長沙人順天籍嘉靖間兵備臨元討鳳維祖其功居多後調提學

張佳印

字肖甫四川銅梁人有文武才嘉靖間任提學僉事邊務多取決之討鳳賊時守禦尤力

陳善

字思敬浙江錢塘人嘉靖間以副使督學教士嚴整歷左右布政整水洞以通灌溉平徭

從清金儲多所建立著有滇南類編

吳檄

字用宣江南桐城人高才能詩文嘉靖間由樞曹任金騰兵備副使雅和風雅士民咸沐

其化有兵部

稿行於世

鄒應龍

字雲卿陝西長安人嘉靖末劾嚴嵩隆慶間任巡撫歷官以才望推糾彈不避權貴至滇

毅然以恢廓自任鐵索菁寇狂御單騎
督征俘馘無算犂穴設所瀾滄宴然

徐 棡

字世寅江南常熟人隆慶初任按察
使劄行條編積弊遂革民甚戴之

徐中行

字子與浙江歸安人隆慶間任左叅議以詩
文與王世貞李攀龍輩稱七子政治尤為精

敏徐屬紳士以邀其獎
掖為榮滇風為之蒸變

朱 奎

字季文江西南昌人隆慶間任瀾滄兵備
副使修建書院講堂積儲備賑士民德之

鄒光祚

字承卿江西饒州人隆慶間任金騰兵備副
使治河堤置義田修學宮遷去士庶思慕不

志

胡心得

字元靜浙江德清人萬曆間任金騰兵備性
嚴重無他好不攜妻子惟一蒼頭侍緬犯干

崖南向刀森與武生岳大成為緬間謀
心得計擒致霖杖斃大成衆心稱快

陳大賓

字敬夫湖廣荊州人萬厯間任巡撫力行鄉約保甲盜賊寢息夷民安樂至改建院署不

勞民力官吏遂不敢以工役妨農

方沆

福建莆田人初左遷安寧提舉清釐鹽弊商民感戴復工文章萬厯間轉督學品隲公明

王凝

字道南湖廣宜城人萬厯間任巡撫時內地兵戈方息緬警復聞邊將入多喜事凝一切

以鎮靜待之後以其數年經畫書檄彙為一冊曰西寺貽稿在任時和年豐召書院諸生於署樓課

藝親為評隲士民至今懷之

吳定

字子德河南安陽人萬厯間巡撫雲南入滇時三宣以蠻莫為辭紛馳告急乃便宜用鄧

子龍於對簿間使帥兵西出子龍至而蠻莫歸滇人安枕後丁改煽虐道阻不通討平之晉秩加恩

陳用賓

福建晉江人萬厯初巡撫雲南有雄略用兵如神甫下車察滇形勢卽題設蠻哈守備未

幾緇賊入寇用間謀檄進羅國襲其後牽制之設八關二堡於三宣要害以戍緬并議屯田又猛卯蠻勾緬構亂檄木邦滅之築平麓城復擒多罕平阿克建學築城績難悉舉以功晉右都御史兼兵部右侍郎諡襄毅廕一子

周嘉謨

字明卿湖廣景陵人萬厯間撫滇值諸蠻變亂用兵七日而克淡泊靜鎮滇人德之

吳應琦

字玉華江南桐城人萬厯間按滇性樸茂而政簡易興學宮盡甃土城以石至今賴之

董裕

字惟益江西南樂安人萬曆間按滇性簡靜少所辭應惟以安民為事人多感之

李忠臣

陝西涇陽人萬曆間任副使道敦大簡重修學宮通鹽市答墨吏建城池為百姓保障

邵以仁

字子任貴州普安人萬曆間任兵備副使寬簡持大體一時幾於刑措永昌立祠祀之

馮應鳳

字邦瑞浙江山陰人萬曆間按滇甫下車值凶歲民間朝夕不給又有緬警應鳳寬不急

之徵 穀無名之費督有司賑濟饑民戒邊地勿弛備禦由是民無轉徙邊患漸消

周懋相

字弼甫江西安福人萬曆間按滇楊禮等煽亂於尋甸懋相連破之逆黨就擒滇境以安

其他實心實政遠邇感慕

許天琦

字大正福建晉江人萬曆間任金騰兵備副使性方毅初視事見三宣六慰土府諸司悉

受緬約束深為嘆息遂一意招徠宣諭威德嘉與更始諸夷稍通未幾卒漢夷思之

蕭

彥

字思學江南涇縣人萬厯間撫滇二載諸所條奏皆西南長計會姚營兵鼓噪授計設伏

竟殲兇渠釋脅從

歷官戶部侍郎

方良曙

字子賓江南歙縣人萬厯初任左布政使仁明慈恕應務如流濬滇池以溉民田時滇寇

新撓困於軍食良曙調給無乏初至庫貯空虛暨數歲富埒諸省又振興理學踐履篤實滇士師之

王績之

字大卿四川南充人萬厯初任叅政分守臨元長材豁度念嗣人採山之苦悉除遠年逋

課民用

蘇息

謝肇淛

字在杭福建長樂人萬厯間任右叅政博洽多才彈壓迤西郡邑士民德之有滇略四卷

刻於

葉榆

郭 棐

字篤甫廣東番禺人萬厯間任右布政使誠心直道會滇西寇蠢動餽運未嘗乏絕清虛

冒之餉省不貲之

費著有炎微瑣言

李先著

山東人萬厯間以叅政分守臨元道不染不撓後以猛廷瑞事被逮死於獄滇人為之流

涕

李 渭

字混之貴州思南人年十四父授以母不敬及思無邪二語即書之壁而服膺焉後遊蔣

道林之門道林問所得渭以取予言行處著力為

對道林曰此亦硜硜小人耳渭竦然復以父意為

宗以必為聖人為主萬厯間由粵東副使來任左

叅政與滇人士講明理學與盱江羅汝芳同官羅

兼談性命而
渭一意實踐

郭良

字復吾福建惠安人萬厯間任僉事分巡安
普渾樓精詳諮詢利弊而興除之署學政取

士公明去滇之

日行李蕭然

羅汝芳

字惟德江西南城人萬厯間任屯田副使晉
左叅政才識敏練尤喜講學開永昌沙河灌

田四千餘畝署金騰道緬莽瑞體大舉攻迤西思
箇堅壁請救汝芳募商人熟入緬者悉偵其險要
虛實更密檄諸夷絕緬糧道斷歸路緬人大困屠
象掘草以食死者山積可刻期盡殲會有聳巡撫
王凝阻之者遂檄汝芳勿妄動因

憤恨而罷緬隨遁去後遂猖獗

許宗鑑

字應衡福建晉江人萬厯間任臨安兵備副
使兵火之後與民休息築河堤置學田辨究

獄禁刁訟歲早步待軌
應去日民錫石誌思馬

李

材

字孟誠江西豐城人萬歷間以按察使管金
騰兵備道才猷敏達暇則講學復刊修身為

本四字流布尤喜談兵
陞巡撫鄖陽僉都御史

馬鳴騫

四川內江人萬歷間任分巡兵
備道建書院置學田著有功績

李文績

字德延四川宜賓人萬歷間由叅政歷按察
使性耿介質任自然略無文飾僚寀讌會一

言近戲則正色嚴辭四壁
蕭然客坐之外他無長物

陳洙

字伯訓福建長樂人萬歷間任提學副使遴
選公明賑濟寒士滇之服教感德者久而不

哀晉叅藩橐中
圖書數卷而已

劉伯燮

字元甫湖廣孝感人萬厯間任提學副使考課學業曠廢者自赴聽責行誼可嘉者禮遇

之士多成就

鄧原岳

字汝高福建閩縣人萬厯間任提學僉事敏練通達所拔皆名士尤善獎掖手註文選梓

行於滇以教後進

張喬松

江西新喻人萬厯間以叅議道守金滄威惠並行捐貲建文峯塔於永昌南山以培學宮

文運丕振

方萬山

字仰之江南歙縣人萬厯間任按察使時兵燹之餘凋疲未起萬山秉公肅憲覈濫冒汰

首功慎獄決釋累獄隴川弗靖旋就削平運籌助贊之力居多公餘寄情山水尤加意作人梓課藝

改學宮人

文蔚起

張堯臣

字希夔四川內江人萬歷間任分守安普左叅政晉按察使調停稅璫不茹不吐因鄉試

屆期提學適缺代

司試事品騰悉當

王應期

字國正湖廣襄陽人萬歷間任兵巡安普副使守羅婺除沙寇不致延蔓馭吏嚴明修持

憲

法

漆文昌

江西瑞州人沈毅有謀略為永昌撫夷同知緬首連年入寇猛哈思化皆助之時議欲加

兵巡撫蕭彥令文昌往撫乃單騎入首壘宣朝廷

德意諸夷誓服或稽首聽命遂築關堡興屯田親

履原隰相度地勢悉中機宜緬人不敢內窺以功

遷廣南知府萬歷間擢金騰兵備副使騰永之民

皆尸
祝焉

沈傲炳

字叔永浙江歸安人萬歷末巡撫雲南先是貢金為崇破家者衆傲炳以疆場多虞力請

減除遂
得免

閔洪學

字周先浙江烏程人天啟間土寇作亂貴州道塞自福建布政擢撫雲南至任委布政謝存仁及叅將袁善督漢土兵屢

破安

効良於需益滇境獲安

朱燮元

浙江山陰人天啟間貴州安邦彥作亂巡撫王三善陷歿遂以燮元總滇黔楚粵蜀五省

軍務駐劄貴陽定水西之難
危而復安歷任兵部尚書

袁善

字復虛昆明人初任順蒙守備陞撫標中軍轉松潘叅將累著軍功尋以事罷天啟初值

水西安首之叛賊至需蓋欲襲省城巡撫沈傲炳以便宜起用善駐兵松林相機剿捕賊隨撲滅滇賴以安陞右軍都督僉事卒贈都督同知廕一子

姜思睿

浙江慈谿人崇禎間巡按慎刑撫叛加惠士民

王世德

浙江永康人崇禎間任巡撫清慎自矢除弊懲奸一切政務必親為理以勞瘁卒於官

王景

四川華陽人崇禎間任金滄道剔蠹釐奸不遺餘力建月城樓重修蒼麓書院

何閔中

字綱卿湖廣黃岡人學問淵博性量寬和崇禎末任瀾滄兵備捍忠禦災功績甚著卒於

洱海士民戴之

楊文岳

四川西充人崇禎間任右布政有才幹旬宣兩途政績甚著捐貲築昆陽州城官至兵部

侍郎

本朝

洪承疇

字亨九福建南安人前明萬曆丙辰進士沈毅有智略順治十六年滇黔未定以大學士

為七省經略督師討平之入滇嚴飭士卒有匿民間子女者繩以重法解散投誠兵丁疏奏滇民疾

苦發帑賑濟全活甚衆

還朝卒贈少師諡文毅

李天浴

字敬茲順天人康熙七年任雲南巡撫廉明勤慎事無大小一秉乎禮除貪暴裁冗費屬

吏凜然無敢犯法者時吳三桂奏請

遷徙滇民天浴力疏止之民賴以安

甘文焜

奉天正藍旗人康熙七年任雲貴總督駐劄貴陽體國愛民時吳三桂逆節已萌僭侈踰

法文焜獨特大體多所裁抑及三桂叛變起倉卒文焜令其妾盛氏自盡攜幼子急趨鎮遠以圖恢復比至則鎮遠守將姜義先已從賊文焜知勢不可為遂殺其幼子北面再拜自縊時筆帖式何善雅圖各棄家從文焜死之

賜祭葬謚忠果

李興元

奉天人原籍順天遵化州康熙十年任按察使方正執法嚴抑藩兵不許違禁取利準折

民間子女吳三桂叛守節不屈杖之下獄復安置蒙化尋遇害戮及家屬興元二孫尚幼時昆明人胡溥寓蒙化匿之蒙士左

世先家得免後廢同知

趙良棟

陝西寧夏人康熙十九年授雲貴總督時大帥圍雲南久不下良棟馳至督諸軍進攻逼

之三日賊潰納款良棟斂兵不入城即日率所部趨曲靖秋毫無犯有古良將風

蔡毓榮

奉天正白旗人湖廣總督康熙十九年授綏遠將軍同諸軍恢復雲南賊平後改授雲貴

總督時逆氛初靖流離載途毓榮招撫散亡給牛種勤耕作籌滇十疏設施各有條理士民至今德之

范承勳

字蘇公奉天正黃旗人康熙二十五年任雲貴總督滇黔經吳逆亂後庶事草創承勳沈

毅剛明到任期月察吏安民撫夷弭盜整飭營伍銷禍未萌建學宮置經籍制禮樂纂修通志凡所規畫無不動中機宜鉅細

悉舉在任六載威惠大行

許弘勳

字元功奉天遼陽人康熙二十五年任按察使秉臬廉慎無所撓枉二十七年楚北兵譁

滇奸卒張麻子等思乘機為變期以三鼓發弘勳偵其謀亟白督撫戒譙樓徹夜無三搗捕斬亂首

十數人兵民帖然消
變方萌厥功甚偉

謝于道

字存莪浙江鄞縣人康熙癸丑進士二十六
年以部郎任提學道學識淵粹是時聲教雖

通士習文體尚多厯雜于道以宗匠持衡破格造
士每試召諸生面教之環繞座前所定高下藻鑑

不爽賞拔多成名士自

是滇南文風彬彬焉

石文晟

字綱菴奉天正白旗人康熙三十三年巡撫
雲南路達多才為政務舉大綱先雲南屯賦

仍前明舊額科重軍戶病之文晟疏減十之六設

立義倉以惠窮兵添建號舍以恤舉子鄉試解額

持疏增廣撫滇

七載士民戴之

劉蔭樞

陝西韓城人康熙丙辰進士四十二年任按
察使方正不阿論囚平恕晉本省藩司值旱

減價糶粟民不苦饑濟六河疏海口葺
學宮增號舍政績甚多後遷貴州巡撫

分部

雲南府

元

阿爾噶里室

蒙古人任晉寧州州同念切
民瘼政先教化境內大治

明

賀安

字朝宗湖廣安化人洪武間任雲南前
衛指揮持重有為築城浚隍皆所董治

張觀

字國賓山西太原人洪武間任嵩明知州簡
直不擾新附之民安其撫字考最陞鳳陽知

府

趙幹

山西平陽人洪武間任歸化知縣尋調武定府石舊縣陞嵩明知州敦大不苛夷民安之

後陞戶

部郎中

鄧思謙

字克讓湖廣桂陽人永樂間任棣豐知縣居官廉能歷九載如一日治署橋梁驛郵市肆

皆其

創建

郭鎮

順天宛平人正統間任新興知州值大溪水溢民不聊生鎮設醴祭河安流如故後知雲

南府勤於其職凡倉廩學校皆所修葺卒於官滇民祀於廣備倉旁新興亦立祠祀之

黃守純

字惟一籍貫未詳正統間任昆明知縣撫字有方舊縣治狹陋遷而大之無絲髮累及間

左

陳文友

字希賢四川長壽人正統間由呈貢知縣調昆明處心樂易政舉大綱有循良之稱

何詵

四川蒼溪人正統間任富民知縣有才幹多所建設

丁貴

江南金壇人正統間任晉寧知州勤慎有才凡學宮壇廟修葺一新水旱祈禱輒應民謠

曰早莫忙公行香
雨莫惱公請禱

陳穀

太和人正統間任晉寧學正先是學在州北甚僻陋穀奏遷於州南訓誨生徒不倦士皆

奮勵

邵昱

貴州永寧人景泰間任晉寧知州廉介有為九年秩滿耆民走萬里赴京請留復任三年

遷廣西平

樂知府

廖芳

字廷舉籍貫未詳成化初任昆明知縣廉敏有能洗滌蠹害凡有興作不擾於民

石泉

字彥清湖廣長沙人成化間任祿豐知縣個儻不羈區畫有要縣當迤西孔道里民因累

盡心調劑

力沒均平

龐詢

籍貫未詳成化間任楊林知縣愷悌宜民疏浚河渠至今利賴

董復

字德初浙江會稽人弘治間以御史任知府宦績茂著有祠在郡左

張鳳

字應時江西宜春人弘治間任知府剛明果斷令行禁止案無留牘

余紀

字文理籍貫未詳弘治間任昆明縣丞操守廉潔綽有能聲當道有難事輒令綜理皆立

辦歷官至

府同知

聶

詔

籍貫未詳弘治初任昆明教諭時方建學嚴立科條盡心啓迪後人咸稱聶先生云

李必昂

福建浦城人弘治間任祿豐知縣清介自勵聽斷如神歲饑請蠲賦以甦民困邑人感之

喻敬

四川內江人弘治間任晉寧知州廉能有為從前廢墜無不修舉

張昇

山東濟陽人弘治間任昆陽州州同增學址練民兵理州政如家事常以私財代官租後

因運糧過滇池舟覆

溺死士民如喪父母

葉元

字本貞江西廣信人正德間任知府廉介有為不畏權貴開異端革汚俗時廣西師宗未

靖元督糧到州計擒賊衆地

方教寧卒於官家無長物

吳便

字廷言浙江山陰人正德間任知府精於法律一切疑獄多所裁決

高公韶

字太和四川內江人正德間以御史言事謫富民典史有惠政置館延師教民子弟風俗

一變尋知大理府威惠併用吏畏民懷
晉參政官至侍郎兩地士民咸廟祀之

陳陽

字健夫江西新淦人正德間以刑部郎中忤劉瑾左遷昆陽州州同築土城以資保障時

課諸生政多卓異州人祀之

廖立仁

籍貫未詳嘉靖間任昆明縣丞攜一僕徒行之任省約安恬未幾以憂去邑人哀金送之

卻不受

王梁

四川廣安人嘉靖間任宜良知縣寧靜悃愍民安其政

王拱仁

四川南部人嘉靖間任三泊知縣
嚴明整肅修城開渠民甚賴之

郭治

江西泰和人嘉靖間任嵩明知州當兵燹
之後立科條嚴執範文章政事卓然可觀

吳世珣

山西保德人嘉靖間任馬龍州同署嵩明
州事剛果嚴明安賊叛臨陣制勝略無畏怯

賊平撫瘡瘼給
牛種多善政

黃潛

福建晉江人嘉靖間任嵩明州同愛民如
子清節著聞遷學築城運餉皆有功又議調

軍改路等十
事上之當道

黃原道

四川巴縣人隆慶初任知府剛直明
斷門無私謁獄無淹繫百廢修舉

王新民

貴州石阡人隆慶初任易門知縣為
政寬平以憂去民不忍舍建祠祀之

樂

頌

江西臨川人隆慶初任嵩明知州操持清約築石城革里甲議徵白米禁易牛毛民甦困

累

張祥鳶

江南金壇人萬厯初任知府學問淵邃督書院諸生課藝時加品臨政事明決無停牘無

寬

民

洪邦光

字世龍福建同安人萬厯初任府同知署理他郡獄訟錢糧悉得其平所過肅然後陞本

府知府刑清政

簡士民安之

李

蓋

字臣忱四川成都人萬厯初任推官博大開朗振興文教習俗一變署臨安府時有梅撲

之役軍興旁午劑量輓運

餽餉不乏召入為御史

張志臯

字汝諧貴州永寧人萬曆初任昆明知縣才局恢宏鋒稜不露處省會劇邑自郡伯以上

無不獲其心在任四年

豈弟之聲騰於衆口

錢貴

四川戎者人萬曆間任富民知縣簡重廉平邑人有李義者為盜所誣獄既成貴廉得其

寃白於臺司得釋義以重賄謝貴叱去

在邑以疏圃自給卒於官士民哀之

沈應昌

四川保寧人萬曆間任宜良知縣清丈田糧改建學校稱循吏焉

劉儲

湖廣興國人萬曆間任晉寧知州精明豁達繕城郭建橋梁置屯堡善政悉舉

田一井

涪州人萬曆間任呈貢知縣大興水利民感其德立祠祀之

夏可漁

涪州人舉人萬曆間任歸化知縣有清德後陞昆陽知州百姓歌之曰公來涖止清慎而

勤公今陟矣民奚
以寧祀報德祠

劉大縉

籍貫未詳萬歷間任歸化知縣清於刑
勤於政教士愛民邑人祀於報德祠

伍佐

湖廣新化人萬歷間任安寧知州發奸摘伏
人不取欺歷官九載清慎如一日民歌曰伍

州收明
如燭

王朴

貴州清平人萬歷間任昆陽知州政持大綱
撫蠻息叛士民悅服先任大理通判亦有惠

政

黃宏

廣東順德人萬歷間任昆陽知州律已以
廉養民以惠又能辨晰疑獄下無冤民

尹鴻漸

蒙白人萬歷間任昆陽訓
導正己率士訓迪有方

陳

紀

字惟修四川內江人萬曆間任三泊知縣拊循有方奸弁奪民田租稅不入按法論罷邑

有鑛山民苦逋課白臺司封之有父子訟獄者憮然曰是令失教罪匪獨在民遂懲其子勸導其父

民感泣父子

相愛如初

翟唐

順天長垣人萬曆間由御史左遷嵩明知州除姦剔弊拊循孤弱循聲表著

鄭邦福

字洪疇江西上饒人萬曆間任嵩明知州慈祥而清瑩精心名理脫離言詮人莫窺其底

蘊遷部郎

官至京卿

費經虞

四川人崇禎末任昆明知縣薄征省訟重士勸農勘覆吾必奎叛黨全活數百人

曲靖府

明

王政

籍貫未詳洪武初任知府創制定法甚便夷民

劉璧

江南鳳陽人洪武初任曲靖衛指揮築城建署廣開屯田措置皆有條理

方用

江南全椒人洪武初由總旗累官至指揮使隨沐英入滇開設陸涼衛即掌衛印修城池

建公署興屯田安民崇寇著有嘉績永樂間調征交趾遂留守交州

王正

江西人永樂間任知府惠愛得民心郡設學校自正始

王式

江南合肥人天順間任雷益知州有惠政民夷交頌之

焦韶

四川灌縣人弘治間任知府興學平賦弭盜招亡郡產嘉禾民歌之曰一本兩穗嘉禾滿

田太守焦公

其德格天

羅環

江西吉水人弘治間任馬龍知州時始改流官勤職受民夷俗漸變竟卒於官

戴鰲

浙江鄞縣人正德間任尋甸知府建學作人化民變俗

龐嵩

字振卿廣東南海人嘉靖間由應天治中出知曲靖府清節自持政先化導立各鄉社學

師夷探有弗率者必以誠感去後人彌思之

文溶

廣西鬱林人嘉靖間任南寧知縣慈惠藹然人稱賢令

李珊

江西臨川人嘉靖間任馬龍知州政無煩苛安銓之變挺身抗敵城賴以全去時軍民泣

留

張秉正

直隸滑縣人嘉靖間任羅雄州州同剛正自持不昵羣小嘗請設流官卒如其議

林斌

福建莆田人嘉靖間任尋甸知府除姦宄任良能徭役均平盜源弭息民為立祠

王尚用

江西安福人嘉靖間任尋甸知府創書院修學宮平賦役同通判蕭時中清丈田地除浮

荒請改折民至今便之

胡光

江南徽州人隆慶間任府同知興廢舉陞剖決明敏夷民畏懷盜賊屏息署蒙化府事建

書院多惠政

梁棟

貴州人隆慶間任亦佐知縣有循良績後離任民扳轅留之

教翔

四川人萬曆間任府同知外剛方而內平恕庭無請謁貪吏望風畏之

孫台

貴州人萬歷間任府同知著有實政大理保之變監需益兵卒於行間

尹耕莘

陝西人萬歷間任推官為政廉明豪強斂迹卒於官囊橐蕭然

夏鐸

山東人萬歷間任府教授厭士習記誦日與講性命之學一時生徒咸愛舊習

粟廷用

湖廣松滋人萬歷間任陸涼知州奉法循理吏民畏懷

李遇春

福建閩縣人萬歷間任尋甸知府以興革為己任濬渠道築河堤置義田寢征調巖閉那

石岡等礦廠分四十三寨以安夷民人皆德之

鄧繼遠

廣西全州人天啟間任陸涼知州政務不擾以便民為事出入惟馭一騎食粗衣布潔清

自矢

臨安府

元

巴哈

張萬嘉勢之子至元間擔任臨安宣慰司同知忠厚嚴明卓有德政

朱寶

籍貫未詳鎮守石屏千戶天曆初圍沁反郡縣皆陷寶同州人亨祐率驍騎五十餘人夜襲宣慰司奪印符以歸據異龍湖島率衆同守州民賴以保障

明

萬中

字惟一湖廣黃陂人洪武十五年從宣寧侯金朝興下臨安鎮兵四出時蒙自瑩阿也引石屏馬黑奴通海觀音奴寧州吉台諸蠻梗化中以兵定之陞臨安衛世襲指揮同知尋陞雲南都

指揮從征安

南冒炎瘴卒

王 執

籍貫未詳寧州衛指揮洪武十五年從宣寧

焯諸部屯兵海東為七營以待執偕中乘夜襲破
追至異龍湖又破之師還擊之西山又擊其逸蠻

於楊知州莊
斬誠無算

任 暹

永興人洪武間任通海知縣改遷縣治威愛得宜

黃 德

四川江津人洪武間任晉我知縣
草創之初一以寬大沖和馭之

李 善

河南人永樂間任建水知州勞心撫字民懷其德

徐文振

字聲遠威遠人正統間任府同知善撫其
民任滿當去民上疏乞留晉本府知府

王

驥

字博德四川榮昌人正統間任石屏州學正立教整肅身無忒儀州士為之一變名為監

察御

史

鄭洪範

浙江黃巖人正統間以御史左遷阿迷知州強直自遂吏畏民懷

詹英

貴州衛人正統間任河西縣教諭性剛直不畏權勢時靖遠伯王驥三征麓川英劾其老

師費財疏

載藝文志

傅厚

籍貫未詳正統間任河西知縣居心仁恕撫字有方邑人祀之

任彬

四川蒼溪人景泰間任石屏知州遷學宮置社學立童子師會土酋刀諒毒殺吏目高秉

權彬當勘訊諒陰行賄彬叱拒之

竟正諒罪以貧不能歸遂家石屏

蔣良

字希玉廣西全州人天順間任河西知縣政務寬厚不喜聞人過有訟者輒引至前諭以

孝弟仁信

皆解去

賴英

江西人成化間任知府有惠政建藏書閣購經史以便諸生講習尋陞布政司叅政

左明善

四川富順人成化間任知府廉明有為民皆畏愛交人寇邊榜諭以禍福即遁去

黃時中

字宜之湖廣麻城人成化間任阿迷知州時初設流百務肇舉中善於撫綏得夷民心

王朝祿

四川江津人弘治初任通海知縣修學舍增倉儲以縣當衝要里甲夫馬為累請更協濟

於河西著為

列民頌其德

蕭鸞

廣西人弘治間任甯我知縣編置糧差備極勤勞

陳澗

江南泰州人弘治間任蒙自知縣有才識苦寇擾築城保禦民賴以安

朱琉

字德嘉四川瀘州人正德間任知府明敏持正時郡中多盜賊琉窮其淵藪剪除殆盡民

賴以安

陳允諧

福建莆田人正德間任建水知州持躬儉約惟以恤民省費為事盡裁常例州民賴之

汪金

字汝礪江西貴溪人嘉靖初任知府性醇謹維持綱紀不為苛細勑置學田士類頌焉

錢邦偁

湖廣蘄水人嘉靖末任知府慈恕得民除一切陋例尋常詞訟為之勸息歲儉設粥救饑

捐俸完民逋賦陞苑馬寺卿去後民歌頌之

何文俸

字東海福建閩縣人嘉靖間任石屏知州單車赴任豈弟宜民操守廉潔

陳仲晦

麻城人嘉靖間任石屏州知州治海口建六閘軍民稱便

王

聘

字士卿南充人嘉靖間任寧州州同善於撫字迎母就養母卒哀毀骨立徒步扶櫬歸囊

無長物

周世用

貴州人隆慶初任蒙自知縣清廉愛民去任行李蕭然個舊錫戶以金二百為贈堅卻之

昌應時

字廷佐福建莆田人萬曆初任知府性坦直不屑趨承時集諸生評騭文藝藻鑑不爽士

林仰之

牛可麟

河南祥符人萬曆間任知府秉性樸直政尚寬和訟斷一成確不可易

許莘

字師尹北直大名人守杭州鞏昌皆有聲萬曆間左遷府通判興學育才臨民慈愛

尹東周

山東人萬厯間以元江通判署石屏州事裁革各款緡錢以紓民困州人祀之

曾所能

四川涪州人萬厯間任石屏知州政務恤民置社倉修陂塘民甚利之

蕭廷對

字觀我江西泰和人萬厯間由國子監助教出知石屏操守廉潔政尚寬平重農築堰置

三社倉儲粟備荒興學課士創建城樓治績最著

朱繼夔

四川瀘州人萬厯間任寶秀巡檢才識練達長於發奸條議建毛木哨以防剽掠置社倉

以儲穀粟有禪地方寶秀民人德之

楊翹瀛

貴州人萬厯間任通海知縣有才力建縣城民得安堵

王鏜

清平人天啟間任知府平訟獄練鄉兵郡人德之

秦懋觀

浙江仁和人天啟末任知府先此任者多以賄聞懋觀至土首普名聲以千金獻不受巡

撫王伉索名聲賄不應誣以叛將討之懋觀歷辨其枉不聽名聲兵薄城下懋觀登陴責之相持兩

月及伉被逮遂解去遷右叅政

顧慶恩

江南吳江人博學能文天啓間以澱江通判署石屏政尚寬大崇重文教纂修州志改創

磚城後遇賊攻得資堅守至今賴之

蔣恒盈

廣西全州人天啟間任曾我知縣遷學宮培育人才撫綏夷民政績甚著

熊啟宇

字六開江西南昌人崇禎末任府推官李定國破臨安宇被執罵賊不屈賊義釋之賊屠

城橫屍二十餘萬宇率殘民塞之後歲饑乏食設法炊粥以賑者兩月全活甚衆

李猶龍

字慕慈湖廣蘄州人崇禎間任石屏知州值
昔名聲叛攻圍臨安州有土人倡亂立斃之

境內肅然率民固守
賊不敢犯城賴以安

朱統錄

字司烜江西南昌人崇禎間以府通判署石
屏州事恤民疾苦異龍湖有水壩魚梁壅塞

水道礙令拆去更築堅堤數百丈以砥之湖水東
流淤田復墾捐給傭值合州永食其利建祠祀之

周之相

貴州人崇禎間任河西知縣寬
賦均役弭盜安民闔邑頌德

張一愷

廣東電白人崇禎間任甯我知縣識力過人
值土司交江波及縣民愷排難解紛請兵鋤

暴又賊劫近村親督鄉兵
擊斬三百餘級民賴以安

本朝

鄭

相

江南江寧人貢生以中書隨征入滇順治十六年委署石屏州事甫下車旬月撫流亡勤

撫恤捐金賑濟適偽總兵高應鳳叛遂被害老幼皆垂涕

澂江府

元

固

納

蒙古人任澂江路總管
首建學宮教民禮義

明

胡思

西安右衛指揮從征雲南洪武十四年西平侯沐英委理府事翦除餽寇撫定夷民勞績

甚多

高恂

陝西人洪武中恂父斗南任新興有惠政以老乞歸舉恂自代由給事中知州事從征交

阻有協

贊功

王彥

字士俊江西安福人由刑部郎中言事左遷雲南都司斷事正統間陞知府招流移剔奸

弊創設三關募民

守之有保障功

魏鑑

江夏人天順間任新興知州歲荒賑饑全活甚衆在任九年始終一節

饒欽

字汝恭江南祁門人成化間任知府清介不滓力卻路南土官之賂巡撫王恕特薦不報

尋以入

覲請歸

曾厚

四川內江人成化間任路南知州創社學以教子弟增重樓於州城之外禦暴賴之

晁必登

字汝吉四川宜賓人弘治間任通判時激守貪暴人情洵洵必登以廉佐之屬邑之民充

板橋江川驛籍者苦於奔應多破產逃亡乃白上官徵銀解驛民困以甦政暇與諸生講易尤長於詩攝篆廣西曲靖尋陞武定同知皆有惠政歷陞本省右叅政

唐臣

字堯佐四川營山人正德間任知府誠懇清謹自奉薄而厚恤民政暇手不釋卷延諸生

討論築四街城設東溪鋪尋陞兩淮運使檄至已卒

劉傑

山西臨汾人正德間任知府明敏果斷謹斛量定商稅均里役稱平政焉

童璽

字國信福建連城人正德間任知府始至郡治弗利改遷於陽溥山移學於郡治舊基

仍以舊學為仰山書院郡東北有溪每值霖潦為害壘築堤東谷障之北流築郡城樹譙樓移屯倉

政績最多

皮日偉

湖廣長沙人正德間任江川知縣奏免雜徭民懷其德

計朝聘

字莘夫四川成都人嘉靖間任知府值歲不登捐俸賑民寬徭省刑開田三千畝

王良臣

字天民陝西寧羗人嘉靖間任知府才識練達吏事明敏別郡疑獄多受成焉在郡禮賢

崇學設樂舞拓文廟

鄒國璽

字南華四川新津人嘉靖間任路南知州築壩開河士民永食其利

徐可久

字有功廣西馬平人隆慶初任知府遷郡治於舞鳳山麓築磚城開河道復義倉社學後

陞本省瀾滄副使

文嘉謨

四川茂州人隆慶間任陽宗知縣每單騎遊歷境內凡地理河道加意修補築埽甸堰塘

濬大衛堤壩民有

父母神君之頌

林焜章

福建莆田人萬曆間任知府清慎豈弟買義學六所以訓生童遇有奸盜化以廉恥不事

鞭笞凡有勾攝即付告人不遺隸卒嘗手題於屏曰不怒不嗔和平養蒼生福勿欺勿慢忠直報聖

主恩丁憂去士民思之

柳芳陽

四川宜賓人萬曆末任新興知州愛民課士勦捕夷賊士民立祠祀之

郎文煥

浙江孝豐人天啟間任知府養士愛民剔弊釐奸河陽有額外夫馬重為民困條議革除

勒石永禁

張

維

山西蒲州人天啟間以推官改授河陽知縣居官清正除火耗絕請託與知府郎文煥庶

正相得民

受其福

李以哀

浙江縉雲人崇禎間任知府崇文行重學校謹倉庫修城池增置砲樓二十座防禦多資

至今

賴之

周應

貴州興隆人崇禎間任通判有膽略知府李以哀致政歸應攝府篆適寧州土酋祿昌文

部目李嵩鵠王尊等率衆焚掠至郡東市應委僚屬守城單騎詣之諭以大義詞氣嚴正賊衆畏服

解去

武定府

元

安

慈

武德將軍與子弄積俱有功於武定

明

董 昊

字子仁江西樂平人成化中官都給事以直言忤旨謫石舊知縣奉職公勤明於折獄片言而決人無冤抑時土酋猖獗賊盜蜂起昊練民兵防禦使遠近相為保聯遂至萑苻絕警土人不敢跳梁後以循良茂著超擢布政司叅議

張 敬

江西清江人弘治中任和曲知州存心慈愛政善民安州人感戴

鄧世彥

湖廣人隆慶間任府同知值土酋鳳繼祖倡亂世彥贊畫盡心輓運無悞用能以次勦平

民鮮失所又創建府治城垣樓櫓地方賴以保障
兵燹之後瘡痍未復彥招集流亡寬釋脅從省刑
薄斂善政甚多一時漢夷帖服
條議改設流官至今頌其功德

劉懋武

扶溝人官生萬歷間任知府多善政郡人為建生祠

王應期

湖廣人萬歷末任知府值土酋沙大金作亂應期出奇制勝討平之

胡其慥

湖廣人天啟二年任知府阿反張世臣作亂慥竭力捍禦抗詞請救城賴以全郡人與前

守王應期共立祠祀之名二惠祠

趙紆

山西人天啟間任知府廉正剛方不避權倖修學崇文旌揚孝弟禮待高年民知齒讓勸

農息訟善政多端滋政三載遠近皆呼為趙青天
陞蒼梧道民懷其德立石建祠紆立命毀之去之

日攀轅卧轍有送
至數百里外者

廣西府

明

賀

勳

字世安湖廣湘鄉人成化間任知府時初設
流官勳至建城垣修學校立廨舍惠農通商

正風俗弭盜賊後
陞叅政仍兼府事

張

黻

江西吉水人成化間官後府經歷以疏救林
俊謫為師宗知州有惠政後以王恕之請復

為南京左
府經歷

孫
久

江西吉水人弘治間任彌勒知州設流之
初多所創建制土司安反側民賴以寧

華

剛

貴州都勻人正德間任彌勒知州明察剛毅有為有守十八寨賊首阿勿等聞其名畏之

輸納逋稅朞月之間政令大行

張

佐

湖廣武昌人正德間任彌勒知州持躬廉介政平訟息平十八寨運籌有方民不知擾

解一經

山西交城人嘉靖間任知府恬靜廉潔在任七載清白無瑕比歸土舍昂齊追送白金力

之卻

許
侶

號號田河南靈寶人嘉靖間任知府實心惠愛剔蠹釐奸民皆稱為許父臨去以一籬椿

植於衙中枯木自活垂陰繁茂

辜用琥

江西南昌人嘉靖間任知府攜一僕自隨清慎恬淡革土司常例省里甲夫馬靖盜息民

豪猾斂迹泣任四載民無欺罔庭
無訟獄以養母致仕民咸思之

李

崧

號肖梧四川內江人嘉靖間任師宗知州甫
下車嘆曰以數十家窮夷當一荒州其何以
堪雖然官守有常吾知奉職已爾去弊興利愛民
如子自奉淡泊粗糲妻子衣布陞任士民保留在
任九載賢聲茂著比陞大理同知民
追送百里外泣涕之聲徹於道路

戴時雍

字逢堯江西浮梁人隆慶間任知府改
築磚城約已省刑勸農課士民懷其德

蔡應科

龍溪人進士萬曆間任知府崇儒愛士獄無
冤民丰裁不露奸宄潛消吏民愛戴歷久不

忘

陳忠

字良甫直隸獻縣人萬曆間任知府廉潔幹
練建永惠壩開東西兩河附近田地盡為膏

腴修築三鄉城於沿江渡口設哨兵
又令戍卒墾荒且耕且守道路以寧

錢秉元

江南吳縣人萬厯間任知府省事愛民捐俸買彌勒州古城田資諸生膏火多惠政民懷

思之

張光宇

字懷谷山西太平人萬厯間任知府秉公直
教風化興學勸農增修堤壩陞山東轉運使

百姓如
失父母

蕭以裕

江西清江人萬厯間任知府課士傳經講論
無倦遷學宮於三台山麓創鶴麓書院事關

學校靡不殫心省刑薄斂善政甚多又修志類若
干卷土酋昔者輅騷擾江外親率師擒之諸夷畏
服

蔣時極

廣西全州人萬厯間任通判廣西為曲臨激三郡交界風多賊藪時極威名素著諸土司

聞來防守皆傾心往迎於百里外申號令明賞罰不煩兵甲夷民讐服

李

啟

湖廣人萬厯間任彌勒知州約已惠下勤恤民隱築堰壩興水利民食其福

張繼孟

字太巖陝西扶風人崇禎初為御史以剛直出為知府正直嚴明興文講武會普名聲死其妻萬氏復猖獗議招撫往者輒被害繼孟單騎入賊營諭以利害萬氏遂降陞浙江鹽運使郡人

肖像
祀之

高梁楷

思恩府舉人崇禎間任知府剗去煩苛悉歸寬恕修復永惠壩水利惠政甚多民間肖像

祀之

王勵精

陝西扶風人崇禎間任通判莊儉仁恕折獄明敏歲大旱自責禱雨米價騰貴毀所繫銀

帶易粟減價賣市中富

民感激爭出粟價遂平

廣南府

明

王道廣

廣東番禺人隆慶間任知府廉靜不擾民蠻相安

元江府

明

程本立

字原道臨海人洪武初官周府長史以累謫他郎甸長官司吏目會諸夷煽誘為亂西平

侯沐英布政使張紘檄本立往撫諭之諸夷帖服
三年入為翰林與修高廟實錄晉僉都御史金川
門失守遂自盡嘉靖初立祠新
化州祀之後崇祀於雲南學宮

汪

輔雲南後衛指揮同知嘉靖間署府事政務便
民有控訴至者訓以禮讓至軍事以嚴御之
毫不敢犯累官貴
州總兵都督僉事

李先芬

籍貫未詳萬厯間任新平知縣始建縣治
築城鑿池庶務齊舉士民感之建廟以祀

秦元穗

廣東人崇禎間任新平知縣才學兼優寬猛
相濟詳請遷移縣治築建磚城外艱歸民祠

之祀

大理府

大理府志

卷之五

五十一

漢

杜

軫

蜀郡成都人舉孝廉為建寧令風化大行漢夷悅服累遷尚書郎

明

趙彥良

字明善浙江烏程人洪武間任通判剛介有文學修大理志要先任劍川州判興革得宜

州人
思服

張

鐸

籍貫未詳洪武間任推官以廉稱

鄭

祥

江南合肥人洪武初調大理衛指揮使增拓舊城經畫之功居多

賴

鎮

籍貫未詳洪武十五年征雲南以功陞大理衛指揮同知二十年調洱海衛訓練士卒守

崇有方略與楚

雄表義齊名

蘇守正

籍貫未詳洪武間任趙州知州學校
祀典壇壝一切皆其開創後卒於官

諸葛伯恒

籍貫未詳洪武間任趙州吏目廉謹有文
學秋毫不擾於民月俸不舂而食布政張

統薦之官

至參政

賈銓

直隸邯鄲人正統初任知府甫下車以郡中
利弊詢父老凡徭賦水利盜賊之類一一得

之以次綜理民皆

樂從陞本省叅政

何宗魯

四川鄆都人景泰間任浪穹知縣
剛直不苛歲饑出粟全活甚衆

蔣雲漢

字天章四川重慶人成化間任知府廉以約
已仁以恤民製文廟樂舞器日進諸生誨之

去任行李蕭然官

至福建布政使

吳晟

江西弋陽人弘治末任知府恢洪直諒人不
忍欺一日雨行與夫忽蹶傾其輿晟不動色

喚食奩取糕食之曰汝飢耶聽訟獨斷吏不得為
奸時召諸生稽其本業戒嬉遊後遷叅政士民遮

送泣

下

李秀實

湖廣永興人弘治間任太和知縣丰采
凜然豪強斂手讞決疑獄罪者咸服

楊樊

貴州人弘治間任太和知縣以能稱時麻字
傾圮擬修之費約千金工以萬計樊曰姑已

之待明年人莫喻其意春正月即諭民應造版籍
各令投狀樊察舊事吏冀里書應索民數千金疲
於候命者萬人樊乃親督造寫毫末不遺仍借此
佐麻字之役人役力一工畝科石一片民視往昔

減半費皆樂于赴功帑不支而事竣吏胥不得索一錢後陞知府

周憲

湖廣安陸人正德間任知府副決如流陞九江兵備副使

方宸

四川新繁人正德間任同知清白自持時太守重罰鍰宸每陞堂感眉而出人服其廉陞

府知

喻河

廣西人正德間任通判通敏有才略時洱河泛溢沒民田地乃令民間各具草束遂自乘舟探河尾淺處卓木為城以草障瀾疏泄之因著為法三年一濬

杜翔

四川崇慶人正德間任浪穹知縣鑿渠灌田以興水利

任轍

四川巴縣人嘉靖間任知府誠心撫字嚴於馭吏時方有檄貨大青督責日至屬吏欲擇

其尤者為獻轍曰此非可繼之物汝不虞為民禍
耶擲而絕之尋以憂去在郡僅旬月後民有隱憂

則相謂曰

安得任公

蔡紹科

浙江黃巖人嘉靖間任知府有便民四事省
里甲治道塗立市肆作宮室人感其德至今

猶稱

之

高鏞

公韶子嘉靖間以御史左遷尋任大理同知
洞儻有風節重修文廟濬泮池製備祭器樂

器有功
學校

周昆

四川永寧人嘉靖間任通判獻獄明決時監
司以法繩下羣吏恐怖會有冤獄衆莫敢辯

昆獨再三爭之監司疑其納
賄昆抗執不回其冤乃白

侯

問

貴州清平人嘉靖間任太和知縣通敏多才
舊例府縣供億之費皆里甲治辦多為在官

者侵奪費常十倍問欲為永逸之計自祭器燕几
及屏幃薪水之細皆繕治而區分之擇吏主出入

民不知費累
遷苑馬寺卿

龍翔霄

湖廣武陵人嘉靖間任太和知縣熟諳吏治
決訟如流他郡邑有疑獄或難事悉委之太

和倉有積粟吏真紅朽獲罪霄令春粟得米出陳
易新民免困累而積貯之數無虧上官下其議行
于閩省後遷南

京兵部主事

劉璧

四川推州人嘉靖間任太和知縣廉介
慈惠捐修祠典愛惜民力民頌不衰

朱官

貴州安莊人嘉靖間任賓川知州實心
愛民建書院修津梁陞楚雄府同知

莫天賦

浙江海康人萬厯初任知府慷慨有為岳鳳之變城守戒嚴人情洵洵適天賦覲還調度

有方百姓安堵

陞按察副使

莊誠

四川成都人萬厯間任趙州知州以興廢為已任凡典禮器物整飭不遺麗江瀾滄二土

司構訟各懷金行賄誠執使封金聞於當路俱寘之法永平汰兵作亂所過殘掠誠百計周防賴以無事清浮糧釐差發疏水利修舉鄉射禁食毒草凡利民生全民命者無不力行州志之修自誠始

張名式

湖廣人萬厯間任趙州州同廉靜寡欲才識高明運餉卻金清田築堡卓有政聲

劉延齡

四川綿竹人萬厯間任雲南知縣發奸摘伏人無邀情四境恬然民不見吏

陳輔

江西廣昌人萬厯間任鄧州知州履畝均田能清影射金錢毫無染指

常真傑

廣西恭城人萬曆間任鄧川知州至誠仁恕築堤開閘減金價惠政甚多

周憲章

貴州思南人萬曆間任雲龍知州平段進忠之亂消林養中之變建州城立州治創廟設

學招撫流離清田畝定里甲裁冗減課經畫盡善

楚雄府

明

朱守仁

江南徐州人洪武間任知府撫民勤政招集流移授以田土均賦役建學校鋤強梗境內

大治

袁義

廬江人羽林右衛指揮同知從征雲南洪武間沐英遣守楚雄時蠻夷叛逼義積糧高壘

調兵力戰蠻遂遁去授楚雄衛指揮使墾田築堰
修城郭建橋梁區畫久遠之計入觀上惜其老令
醫為染其鬚髮俾仍撫治以威遠人
後徵還厯官都督僉事卒賜祭葬

馬良

山西黎城人正統間任楚雄知縣鯁直不
阿政尚簡易凡有益於民者行之必力

鞏珪

江南貴池人正統間任黑鹽井副提
舉侃直任事秩滿父老遮留不忍別

計澄

江西浮梁人景泰間以御史來守郡興學育
才釐奸剔弊盜賊遠遁民賴以安陞廣西按

察司

副使

鄒慶

貴州思南人景泰間任鎮南知州以廉能稱
闕街衢立公廨興學校弭盜安民後陞姚安

府知

邵

敏

湖廣湘陰人少以孝聞成化間任知府勤恤民隱初郡民不諳絲枲敏為市桑麻木棉教

士女紡織政事

咸舉纂修郡志

李

純

廣西桂林人成化間任鎮南知州潔已恤民恥為阿私修理壇廟百廢俱舉後陞南昌知

府

鄒

傑

湖廣京山人成化間任廣通知縣清謹惠和布衣蔬食始終如一建學置田積粟備荒後

邑人以兵燹飢

困賴賑濟焉

吳

永

廣西平樂人成化間任黑鹽井提舉井有蛟為害民患衝決永于北門作石壩鑄鐵牛鐵

索各七鎮

之害遂息

虎臣

陝西麟遊人慷慨有氣節成化末貢入太學上書諫萬歲山棕棚登眺事憲宗竒之授磬

嘉知縣始至黜奸崇良招撫夷獮次年委勘景東土官讎殺事夷投賄力卻遂中毒死邑人懷之

范璋

浙江餘姚人弘治間以工部主事忤權貴謫呂合驛丞尋陞楚雄知縣卜遷學宮於勝地

引蓮池水以灌泮池
誨勵諸生多所成就

蔣哲

貴州衛人弘治初任廣通知縣剛介廉明沐國公家人有恃勢作威者哲按治如法卒於

官百姓哀之

董朴

湖廣麻城人正德間任知府課農桑立哨堡建學舍增祭器尤勤於講學諸生有貧不能

婚葬者捐貲助之陞江西叅政

祝弘舒

四川溫江人嘉靖間任知府因俗為治尤篤意文教易五顯祠為龍岡書院卜遷學宮以

當形勝策勵諸生人文崛起武定鳳朝文之亂區畫城守遠近避亂者歸之賊不敢入其境

李邦表

四川定遠人嘉靖間任知府操守廉介久而不渝建聚奎樓聚徒講學懲奸正俗境內肅

然

戚慎

江南宣城人嘉靖間任知府清介不染不畏強禦卒於官囊無餘財寮屬醵金以殮

傅昂

江西金谿人嘉靖間任府同知廉明剛正嘗收軍儲洞知暗納之苦議請減徵事垂成而

昂以遷去遂不果行識者憾之

劉名弼

直隸長垣人嘉靖間以通判署楚雄縣事仁恕清慎創建義學克成厥功邑之人文蔚起

皆其力也

區元晉

廣東新會人嘉靖間任鎮南知州政治循良好士愛民修建廟學

何應和

廣東東莞人嘉靖間任南安知州單騎赴任出不乘輿暑不張蓋撫民以仁禦盜以信境

內肅然後以終養歸踰年有安竟之變州人咸曰何公在當不至是

苟

詵

四川華陽人嘉靖間任南安知州性剛操潔值州境安竟堡夷賊肆掠渠魁數十人皆勇

悍狡黠撫剿俱不能致詵出奇攻入巢穴伏兵格殺之立哨於要地調官卒守禦民感其德立祠祀焉

董家

四川人嘉靖間任定遠知縣廉明公恕催科不擾額賦得完自家始

越民表

貴州宣慰司人嘉靖間任定遠知縣清直慈敏均徭役革屯弊扶弱抑強多惠政後陞任

湖廣軍民

泣送之

吳習

貴州赤水衛人嘉靖間任廣通知縣仁恕公廉不畏強禦不濫科徵凡公署橋梁靡不修

飾

張大亨

廣西全州人弱冠領鄉薦謁選候長安邨中嚴嵩初入相為其大父門人遂引疾歸終嵩

任政府二十餘年不出及罷相始出判端州隆慶初擢楚雄府府同知攜一蒼頭一稚子灑然甚適也

於吏事迎刃而解芟除九場巨懸郡民依依如獐子之慕父母比代守者入覲以經費不給中道歸

家

黃袍

四川南充人隆慶間以定遠知縣署鎮南州修建土城買置義塚地

張九歌

山東曹州人萬歷間任知府廉明剛斷有倚勲勢於部內誅求者力裁抑之卒不得逞後

以憂去

侯文才

四川營山人萬歷間任知府郡人不知紡織文才始教之蠶桑勤者賞惰者罰布帛之利

以興

顧閔

貴州清平人萬歷間任楚雄知縣年尚少性術慈厚見刑非其辜者惻然哀憐之實畝清

賦平徭恤惇尋遷趙州知州

尹為憲

湖廣武陵人萬歷間任鎮南知州推誠孚衆戢盜興賢重修磚城為一方保障

何居毅

福建晉江人任府通判萬厯間署鎮南州愛民造士修學宮置祭器經書士林德之

李翹

四川大邑人萬厯初由雲南府通判陞南安知州視民如子常均貢賦利民州人肖像偕

溫可貞殷輅為三賢祠祀之

溫可貞

廣東莞人萬厯間任南安知州沈毅多謀時鎮庄民施成信等乘武定之亂脅黨肆掠

貞率士民設方略誅之邊境獲寧

殷輅

廣東博羅人萬厯間任南安知州奉母至孝風動一州尤多惠政與溫李齊名

劉之範

四川富順人萬厯間任廣通知縣建城郭靖盜賊舉孝行培風水泣任八載清正仁廉愛

民如子三薦七獎行取評事

羅廷璠 江西新建人崇禎間任知府下車備詢疾苦一切與民休息興學除奸政聲大著後卒於

任郡人肖
豫闕聖祠

姚安府

周

小

卜

楚莊躡將戰死
蒙氏立祠祀之

漢

韓

說

與司馬相如同開益州領
弄棟蜻蛉諸縣有賢聲

唐

梁積慶

慶一作壽高宗咸亨間為姚州道
行軍總管值姚州蠻亂討平之

明

戴都

江西人洪武初以指揮守禦姚安姚僅土城
仍唐舊制甚闊難守都撤而小之易以磚石

至今恃
為保障

岑

斌

浙江錢塘人洪武間征雲南有功陞姚安千
戶千戶所公署其所管繕尤得士卒心及卒

無不痛悼
為之立祠

高宗壽

豫章人永樂間任姚州知州剛果明銳練達
老成修祀典興學校建橋梁勤撫字陞陝西

鳳翔知府郡
人至今思之

吳潤

江南武進人永樂間任知府居心平恕政治循良白鹽井酒竭課虧潤為奏豁逋課竈丁

皆深

德之

馬自然

字性之四川內江人成化間任知府誠心愛民時大石湖水散溢民不均惠乃築堤開東

西二閘以時啟
閉利賴實多

劉昂

字廷舉山東海豐人成化間以給事中謫姚州州判均徭平賦民甚德之

任弘

四川南充人弘治間任知府正大寬洪拓先師廟及門廡齋泮尋陞左叅政

王嘉慶

字佑之四川內江人弘治間任知府秉性剛果不避權勢興利除害建東西南三城甃石

橋以通鎮遠靖蛇諸

渠之水民不病涉

黃

澍

福建候官人正德間任知府開朗平恕創建棟川書院課士讀書又嘗伸理冤獄一郡頌

為神
明

楊曰贊

字堯臣江西揭陽人嘉靖間任知府剛方廉潔斷事明允時苴卻蠻荼毒民人流移者衆

贊白諸當道除之又議設守備督營兵為守禦長久計尋以家難棄官歸民立石頌其功

趙良華

字居實四川眉州人嘉靖間以員外郎任知府廉明剛直初吏靡在府外華遷之以便防

閑卒於官
士民悲悼

王

鼎

字汝調河南汝州人嘉靖間以御史任知府嚴明清慎修城池飾學校禁婦女不得市易

惟事桑麻立保甲以
察盜賊姚俗稱治

陳祥麟字伯仁福建莆田人嘉靖間任知府力清利
弊鄰郡重獄未決者咸委質焉姚人頌為青

天以
憂去

何勛

字毅夫湖廣枝江人嘉靖間任知府平易寬
仁修築夾口壩注水以濟大石湖之不及遂

為永
利

王德純

字一之湖廣羅田人嘉靖間以御史任知府
剛明正大不事煩苛新棟川書院修儒學遷

養濟院意篤士
民惠周無告

趙澍

江西安福人嘉靖間任知府練達典故州所
丁糧徭役凡舊事之偏駁者悉為釐正至祭

器射圃經理井然去
之日姚人遮道泣送

趙

恒

福建晉江人嘉靖間任知府有才識尤善聽訟曲直莫逃其鑑著有春秋錄疑

莫

相

廣西全州人嘉靖間任姚州知州才敏行潔安鳳之變倡大義聚民得萬餘人晝則張旗

鼓以示威至夕登陴共守夜不解帶賊憚而不敢入後陞四川僉事

周希尹

廣西宜山人萬厯間任知府通才潔守務敦大去煩苛禮貌待人毫不假借一時土官奉

法惟謹建尊經魁星諸閣修南中書院覓大石湖諸閘不費公帑不煩民力士民德之

童述先

湖廣沔陽人萬厯間任推官署府事自武定變後民力凋瘵述先革軍民火耗及所解公

賞積弊米鹽各稅減白井沙浦課五百金民困以甦

周良士

湖廣邵陽人萬厯間任姚州知州坦衷潔操樸誠慈愛不輕色笑不設畛域平減差徭擴

夷楚交訐之禍出姚人水火之中尤庶幹風厲
不為時局所阻勘審最詳主持亦確姚人德之

楊之彬

湖廣麻城人萬厯間任姚州知州慈衷潔守
敏才卓識省獄訟平賦役蠲苦丁復鹽市修

學宮一郡利弊盡為釐舉其

大者開拓城郭功尤茂著

吳崇德

字東臯江南虹縣人萬厯間任白井提舉慈
祥不苛恤竈以完課易員以便民竈戶居民

咸德

之

孔元德

貴州威清衛人崇禎間任知府姚境地土曠
遠旱潦不時各湖潞水艱於全濟元德親行

擇地捐俸添築豐樂湖聚水溉田遂增
穀千餘石民生永賴後陞兵巡安普道

永昌府

漢

鄭

純

字長伯，鄭人。明帝時任西部都尉，為政清潔。化行夷貊，君長皆獻土珍。頌德美天子嘉之。以為永昌太守。純與哀牢夷人約，邑豪歲輸布貫頭衣二領，鹽一斛，以為常賦。夷俗安之後，園形東

觀

曹

鸞

巴人。桓帝時任永昌太守。時黨錮甚嚴，鸞乃上書曰：夫黨人者，或者年滿德，或衣冠英賢。

此宜股肱王室，左右大猷者也。而久被禁錮，辱在囹圄，謀反大逆，尚蒙赦宥。黨人何罪，獨不開恕乎？所以災異屢見，水旱游臻，皆由於斯。宜加原宥，以副天心。帝怒，赦之。

馮

灝

廣漢人。建和間任永昌太守，政多異績。

三國漢

王

伉

蜀郡人章武元年任永昌府丞有保境功諸葛亮表為永昌太守封亭侯

霍

弋

字紹先南郡枝江人章武末為太子舍人後主踐阼立太子璿以弋為中庶子璿好騎射

出入無度弋援古規諫後為參軍庾降屯副二都督又轉護軍統事如前時永昌郡夷獠恃險數為寇害乃以弋領永昌太守率徧軍討之斬其豪帥破壞邑落邊境遂得寧靜遷監軍翊軍將軍領建寧太守

晉

孫

辯

江陽人永昌郡從事太安元年上南中形勢七郡斗絕應復置寧州以相鎮慰冬十月復

置寧

州

元

段阿堅

大理人以都元帥
守永昌威德並著

明

葉學則

江西德興人博雅善詩歌洪武間常應召對
十八年以奉訓大夫命為永平社學師始開

文敬

胡

淵

定海人掌金齒司事初李觀建郡城於太保
山下觀卒洪武二十八年淵拓而上之金滄

副使林俊創名
宦祠淵首與焉

次定四車全書

雲南通志

卷

胡琛

淵子字廷貢文雅有度繼掌金齒司事興學勸農安邊勵俗父子皆有賢聲

胡誌

琛子儀度嫺雅有祖父風正統初襲父職從征麓川提銳卒為前鋒有功陞雲南都指揮

僉事尋陞都督僉事還金齒在鎮二十餘年外輯內寧人民安堵

陳昇

籍貫未詳金齒司指揮使正統十一年麓川平兵部侍郎侯璉奏調騰衝司掌印築城濬

池壑闢田野軍民利之

毛福壽

山西人正統間任騰衝指揮通水利立社學隨征麓川擒賊子思機叛首畏懼以功陞都

督同知晉南寧伯

郭本

字道充廣西融縣人天順間以監察御史左遷永平主簿剛直廉介拓縣治綏流夷常言

永平小邑不宜冗員後召還
遂上疏請裁主簿不復設

嚴時泰

浙江餘姚人嘉靖二年永昌初復府諸事闕
略人心未安泰來為守立法定制修輯署宇

綏柔瘡痕控制蠻夷撫馭卒伍勸學
課士政務畢舉著有專城錄一卷

童蒙正

銅梁人舉人嘉靖間任知府和易有
為歷任九載如一日擢福建鹽運使

戴希灝

廣西柳州人嘉靖間任府同知愷悌廉明絕
請託卻夷金興水利勤講課在任八載遷長

史去行李蕭然
士民泣留遮道

孫衣

貴州清平人嘉靖間任保山知縣杜喧
寨餽送愛民而嚴吏後陞雲南府同知

李輻

字文興江西吉水人嘉靖間任騰越知州溢
事勤敏備禦嚴整終輻之任守城者終日不

敢弛其為武衛見憚類此會採寶石於猛密夷酋素聞輻威望對商人曰委官得如李公來必不欺

擾我土未久去
官士民思之

沈祖學

浙江人隆慶間任騰越知州修坊表建義倉立書院均里甲崇學校纂州志修高崙險道

善政
頗多

戈中和

四川南充人萬曆間任知府政務安靜時緬蠻於金騰沿邊市牛鹽意在窺覘中和謂當

過其漸乃請於
巡撫力禁之

陳巖之

福建人萬曆間任知府廉威遠播
崇重正學以破緬功陞兵備道

張元諭

浙江浦江人萬曆間任知府廉介方正上官有索庫羨者諭以庫簿示之遂止禁火葬及

婚喪奢侈
挽以儉朴

陳

師

字思貞浙江錢塘人萬歷間任知府嚴禁通夷並治材官悍戾以靖軍民操守矚然不滓

宋

儒

四川峽江人萬歷間任府同知廉介愷悌禮士愛民征阿波堵魯四力阻殺降去任之日

士民遮
送不絕

楊文舉

四川南充人萬歷間任保山知縣敏才雅量勸課諸生築城臺以便守禦行取給事中尋

典試雲南
所拔得人

杜可教

四川德陽人萬歷間任騰越知州清廉惠愛樂緬有功士民感之

李之仁

貴州人萬歷間任騰越知州先年屯徵俱衛屯官解年例科派苦不可支之仁察蘆宿弊

條議歸州乃獲
完額而民免累

董獻策

籍貫未詳任騰衝衛叅將萬厯間隴川多安
民叛五年未平獻策隨兵備黃文炳討之身

先奪砦擒其

渠帥而還

鄧子龍

字雲卿江西豐城人萬厯間任永昌叅將持
重多謀慷慨任事緬人犯掠施甸焚殺極慘

子龍追及於攀枝花大敗之斬景宗真以靖灣甸

擒罕度父子以開耿馬捉莽裕以平阿坡築建關

城多其持畫能詩工書有古名將風鎮姚闕關清

平洞平丁苴白改夷後陞邊帥屢立戰功有枕戈

集行

世

劉

綖

江西南昌人父為總戎綖不假恩廕自立武
功萬厯間以遊擊領騰衝衛守備事擒岳鳳翥

烏緬人不敢窺邊招思忠莽灼遠夷傾心志在滅
緬功已垂成為宵人中阻扼腕而去平播竹征關
白功業甚著累功至大
帥勇略雄才推為名將

吳顯忠

浙江山陰人萬厯間任騰衝叅將協贊漆文
昌屯田之議將兵平順寧騰衝各處叛夷殲

多俺平麓川
其功居多

陳文

籍貫未詳萬厯間任騰衝衛指揮衛地歷年
既久拋荒逃糧最為民累文建議請照安寧

易門等州除膏腴照舊承納外凡衝墮崩塞乾涸
之地議為常年災傷折色減作三錢屯因始魁胎
惠無窮

劉鼎臣

籍貫未詳萬厯間任騰衝指揮僉事建
八要六害之議蘇屯田積困軍人賴之

鶴慶府

明

林道節

福建莆田人由刑部主事歷官瀘州知州正統間鶴麗土知府高倫暴虐靖遠伯王驥奏

革之即薦道節為流官知府撫治夷民廟壇驛堡多所修建規制一新

甘鳳

廣東南海人正統間任劍川知州政務威嚴而待士甚厚

胡信

江南丹徒人天順間任知府耿介清儉有興學造士之功

王珉

浙江錢塘人景泰間任知府多政聲凡三載有麥秀兩岐之瑞

張海

山東德州人成化間以太僕卿忤中貴出為知府愛民教士卓有政績後陞府尹

賀從政

湖廣湘鄉人先知順州成化間陞廣西知府尋改鶴慶公慈平恕郡人至今稱焉

劉珏

四川內江人弘治間任知府有惠政民夷信服歲凶盜起珏捐金賑濟以活饑民盜賊由

之解散
致仕歸

劉讓

江西吉水人弘治間任劍川知州能除民害頌德不衰

孫偉

江南靖江人嘉靖間任知府威輯強暴去之日民號泣不忍離

馬卿

河南林縣人嘉靖間任知府修築堤壩水利均平與諸生談經講性多所造就

姚大英

貴州烏撒衛人嘉靖間以永昌府推官攝府事清介不染毀淫祠清吏弊人心悅服

方啟念

湖廣巴陵人嘉靖間任劍川知州恤民疾苦有愷悌聲

越民牧

貴州人嘉靖間任劍川知州以才能稱百廢備舉去任之日士民歌思

桑荆初

四川永寧人萬厯間任知府剛果嚴密鋤暴扶良修學之功尤著

祁汝東

浙江山陰人萬厯間任知府愷悌廉明先是北衙礦課累及里甲會江盈科以恤使至汝

東與謀極力丐免盈科特疏請蠲民賴休息

余廷楨

浙江鄞縣人萬厯間任知府革弊除奸法無假貸緩催科輕礦課民賴以甦涖事期月以

勞瘁成疾聞稍瘳乘間壞法猶力疾逮治及卒百姓傷之為立哀思碑

鄭恩

湖廣當陽人萬厯間任府經歷惠愛及民不事敲扑諸所豎立卓然有聲

李光芬

四川忠州人萬厯間任順州知州性淡泊有才幹創州城社學墾田增賦有古良吏風陞

永昌

同知

陳開泰

字茹連廣東三水人崇禎初以南京戶部郎中任知府愷悌廉靜歲饑賑粥全活無算文廟

災竭力鼎建罷羨耗卻陋規賑水災
遷副使備兵威清士民遮道泣送

劉壁

山東壽光人任同知周知民間疾苦聽斷
執法人不敢干以私以下三人年任未詳

張廷俊

浙江鄞縣人任同知均水利
訓社童嚴寇賊惠政實多

于大節

北直任邱人以御史任推官清直自持
蒞政三年豪惡屏跡官至山東按察使

順寧府

明

余懋學

貴州人萬厯間任知府時郡初設流凡城池官署學宮祠廟錢糧賦役皆所經營裁定尋

陞金

騰道

李忠臣

貴州永寧人貢生萬厯末任知府立政寬大節儉持身而樂於施與治蹟與余懋學媲美

郡人建余李二

太守祠祀之

永北府

元

章吉特穆爾

麗江人從世祖征大理屢戰有功賜名特穆爾陞北勝知府兼管麗江宣撫司事撫

治有方民

夷咸服

高祥斌

字廷理大理人任北勝知府明玉珍寇境斌率兵破之生擒品甸偽王以功陞雲南行省

中書

右丞

麗江府

明

高

賜 鶴慶人元為義兵萬戶洪武間歸附從征佛光寨招諭未附者輸金助餉授通安州同知

有惠政夷

民德之

蒙化府

明

蘇海鎮

太和人洪武間以經明行修
辟授蒙化學正忠信化俗

劉童

福建人永樂間任蒙化知
州以惠政為夷民感慕

許尚

陝西人萬厯間任府同知清慎嚴
明愛民禮士繩奸緝吏境內肅然

劉作沛

廣西馬平人萬厯間以提舉署府事
置田養士易里甲為條編蒙民便之

閔廷桂

湖廣常德人萬厯間任知府仁心
仁政尤多材藝吏畏而民懷之

段銓

陝西臨洮人崇禎初任定邊知縣廉潔剛方
博治經史憫邑文教未興廣勵不倦去任之

日行李蕭然
士民感之

景東府

明

張

吉

餘干人成化間以工部郎中疏劾李孜省及僧繼曉等上怒謫景東通判景地居雲南絕

傲俗鄙戾吉教以禮義民有罪者薄責之約無再犯土知府見吉不攜家欲為置妾不聽遺以銀器復不受心敬吉遣其子榮就學由是夷民嚮慕漸有中土之化吉益自勵作慎獨窮理改過求仁四箴置座右忘其身之在蠻也

忠烈

附

總部

元

欽定四庫全書

雲南通志

卷四

仁通

多爾濟之子至順元年正月雲南諸王與萬戶伯忽等叛仁通率官兵拒之歿於陣

馮文舉

四川什邡人初舉鄉試授漢川學正達魯噶齊燕僚佐以一手致酒舉不受隱去次科登

進士第任雲南儒學提舉至元間明玉珍攻雲南城將陷文舉謂其妻曰某受國恩愧不能退賊今

有死而已爾光州馬中丞孫女也其從之乎馬曰夫以義亡妾生何益遂焚香北面拜俱縊於學官

巴咱爾幹爾密

梁王明師入滇達爾瑪既敗王聞之奉其母嘉僖率妻和托沁等百餘人

乘舟趨昆明池謂行省右丞魯爾等曰我宗室無降理仰藥死妻子皆死之

婁爾塔坦

蒙古人雲南行省右丞既進毒於王即自殺從死者幾二百人

明

方政

全椒人正統間官左都督麓川思任叛陷騰衝據潞江朝廷命黔國公沐晟率政等討之

思任斷江立柵師不得渡政造舟六十艘破其柵斬首三千餘級逼思任於上江而諸軍無繼之者頃之夷兵四集政以旂牌求救不至乃遣其子瑛曰汝急歸吾死今日矣瑛牽裾不釋政拔劍叱之乃躍馬突陣賊為披靡馬躓為賊攢刺而死事聞贈威遠伯諡忠毅時都指揮同知顧勇陳翊侯義江洪等皆同時戰死

徐樾

字子直江西貴谿人嘉靖間任左右政元江那鑑叛尋詐降撫臣以大吏往撫樾行被殺

贈光祿卿

張澤

字義甫江南桐城人嘉靖間以兵備道督兵討鳳繼祖敗績被執罵賊而死贈光祿寺少

卿

周士昌

四川內江人崇禎間任左布政士首普名聲
叛巡撫王伉疏請會剿令士昌監軍遇伏發

力戰
死

朱永吉

字飛之廣西桂林人精天文術數初客黔投
博宗龍幕中安邦彥圍黔永吉解圍有功後
隨宗龍至滇崇禎間滇撫王伉討普名聲題授遊
擊屢破賊衆為名聲所憚後因吾必奎通賊永吉
身被重傷伏發力戰死偏將趙能馮忠葬於路
側趙能亦自刎事平題請廕一子世襲百戶

羅國嘯

四川宜賓人崇禎末任巡按沙定洲陷省城
不為屈行法自如流寇至國嘯巡視被執至

省縱火
自焚死

朱壽鉢

宗室崇禎末以部院徵兵雲南孫可望至曲靖被執不屈械繫二十餘日強以官復大罵

不食可望殺之題詩於壁云丈夫勁骨傲千秋青史丹心一片留金碧有燐隨我化江山多故倩誰收煙塵已暗中原路風雨仍翻徹夜愁寧使忠魂歸見帝肯教含垢對深讎與僕三人同遇害

楊畏知

陝西寶雞人崇禎庚午解元特授金滄副使土酋吾必奎叛陷定遠畏知奉檄來援遂駐

節楚雄繼值沙定洲陷省城沐天波西走定洲追至援兵潰散畏知募民為兵雖在倉卒而措置得宜間出兵勝之兩年之內沙賊環攻者百次畏知坐城樓賊發巨礮擊中寇憤不為動賊疑為神解去後孫可望至迤西畏知率民兵禦於獅子口兵敗赴水為可望兵所得素重其名願共事討賊迤西得免屠戮畏知力也後竟以忠直為可望所殺楚雄立祠祀之

本朝

閔洪標

河南人任提標前營遊擊康熙十九年在安南衛沙子哨與吳賊對敵奮勇先登以身陷

陣而死事聞

賜卹廕

林宗珍

福建人任提標後營遊擊與賊戰於安南衛沙子哨奮勇衝鋒被飛石中其額遂歿於陣

事聞

賜卹廕

魏翥國

字爾臣昆明人從定西藏剿魯魁平法戛歷任督標中軍副將雍正八年烏蒙祿萬福叛

奉檄援東川途次為萬福之叔祿鼎明刺傷左股負創馳保東城時已報陞臨元總兵矣旋以創劇

還省遽卒事聞

賜祭葬贈卹廕一子

分部

雲南府

明

蘇夢暘

籍貫未詳萬厯間任祿豐知縣時鄭舉等叛從武定寇祿豐夢暘率民兵力戰至元旦方

朝服祝釐賊衆擁至被執不屈死之男萬民為父上疏贈光祿寺少卿廕子立祠

龍旌

趙州人萬厯間任嵩明州學正武定賊陷嵩明被執罵賊而死贈國子監博士

韋宗孝

籍貫未詳萬厯間任嵩明州吏目楊禮等攻嵩明城陷宗孝闔門死之詔贈本州同知廕

一子
入監

王

信

四川宜賓人崇禎間任呈貢知縣普名聲叛鎮撫令信為監紀敗績罵賊而死事聞于贈

廕

夏祖訓

字仲有浙江秀水人崇禎末任呈貢知縣流賊破城死之

本朝

高顯宸

直隸灤州人康熙九年任知府立品剛方治嚴肅吏胥不敢肆其奸吳逆叛抗節不從

遂杖於市戍永昌衛服毒而死事聞贈太僕寺卿

廕一子入監時同知劉崑江西南昌人亦以抗節

不從同受杖戍騰越

恢復後以原官起用

曲靖府

明

郭俊義

山西平陽人萬厯間任陸涼知州涖政嚴明苞苴屏絕有膽力天啟間設科入境焚劫俊

義率鄉勇家丁禦之歿於陣

周嘉映

字伏龍中衛人天啟間以武舉署霑平守備值霑益諸蠻謀不軌時正發兵援蜀嘉映以

密書告變謂蘭州之患遠在千里霑益之患近在目前宜早為之備語洩蠻深恨之後從叅將尹啟易討賊馬蹟為賊所害

焦潤生

字茂慈江南上元人崇禎間任知府流寇陷城不屈而死

臨安府

明

邵鑑

江南壽州人臨安衛左所百戶正統間征上江刀招罕寨力戰死於陣

游大勲

江南婺源人崇禎間任府通判好士恤民以才略著普名聲叛大勲督土舍王顯祖及郡

人趙定周往禦營壘未立賊突至土兵奔潰勲正色當之遂遇害定周亦死之

朱家梁

江寧人崇禎間任寧州知州沙普焚劫罵賊殉難

單國祚

浙江會稽人崇禎末任通海典史管本縣驛務值沙逆兵破縣城坐堂上持印罵賊被殺

既死而印猶在手握拳透爪縣人葬於諸葛山下

陸九衢

保山人任甯我訓導丁亥流寇攻破縣城九衢衣冠坐明倫堂罵賊遇害

本朝

郭維賢

籍貫未詳任阿迷州吏目康熙四年祿昌賢叛兵掠布洛維賢奉命往撫賊衆劫之罵賊

而死

武定府

明

袁俸

四川人任府同知嘉靖間值鳳朝文之亂一門全節以殉

秦健

廣西馬平人任祿勸知州鳳朝文叛健監守汎地賊攻圍急遂遇害

常存仁

府教授

高心

府知事

張成

府照磨

劉

瑀

祿勸州
吏目

俞伯官

巡檢 以上五人籍貫未詳俱死鳳朝文之難

金守仁

指揮

王應爵

魏守恭

張

斗

俱千戶萬歷三十五

年阿克鄭舉叛城陷俱死之立義烈祠祀焉

楊于陞

四川劍門人任府同知善談理學建書院於署左每延士子課文講學崇禎四年普名聲

叛巡撫王伉令陞為

監紀賊破營死之

高其勲

字懋功馬龍人武舉襲指揮以才能陞沐鎮中軍吾必奎反授叅將命守武定後沙定洲

叛攻武定勲竭力守禦城陷仰藥死

廣西府

明

徐道興

河南睢陽人崇禎間以都司經歷署師宗州性廉潔不受民一錢郡多逋賦道興激勸有

方積逋皆完聞流賊屠曲靖嘆曰力薄兵微不能抗賊吾死分也爾士民何罪而罹此慘乎各率家遠避勿顧我士民欲道興同行興厲聲曰社稷之臣死社稷封疆之臣死封疆吾志決矣言罷鬚眉奮張衆皆泣去左右止一僕以白金二錠囑之曰此朝廷俸物也念汝勤苦多年以一酌汝其一俟賊退置棺斂我僕擲金大哭力請從死歷一日夜忽見塵起興曰賊至矣爾不即去我與爾皆無遺骨爾之過也僕叩頭泣血狼狽出城賊闖入中堂興大罵賊猶迫其出迎賊首興愈怒以手中酒盃擊賊曰吾朝廷命官豈從賊求活者耶罵不絕口遂遇害

元江府

本朝

沈洪

浙江人新平縣典史署揚武壩巡檢事雍正十年擢賊叛竭力堵禦被殺

丁珏

浙江人原任揚武壩巡檢丁憂解任委管青龍廠務擢賊叛圍困不屈死之

王昌

陝西寧夏人撫標千總擊擢賊於喇博坡歿於陣

汪自貴

四川華陽人督標把總擊擢賊於阿者奮勇赴敵死之

洪先

開化府人臨元鎮把總與賊戰於戶東山後歿於陣以上五人事聞俱

賜祭葬贈廕賞

卹有差

威遠

本朝

劉弘度

湖廣廣濟人任威遠同知雍正五年夷賊叛死之事聞

賜祭葬贈廕

賞卹

昭通府

本朝

劉鎮寶

江西彭澤人任烏蒙府通判雍正八年逆夷祿萬福叛陷府城死之

陳天錫

本姓龐會稽人任烏蒙司獄祿逆之叛見鎮將不戰憤願捐軀妻張氏請先死手刃之遂

自列

劉懋美

陝西金縣人任烏蒙府知事祿逆叛亂遇害

賽枝大

山東青海衛人署恩安縣與劉鎮寶同死事

葉祚徽

浙江人任烏蒙魯甸巡檢與劉懋美同死事

李焜

昆明人康熙戊子五經舉人任烏蒙府教授慷慨有才幹凡修學建城均田上官皆委任

馬祿逆之變
死于學宮

劉崑

字玉巖四川保寧人屢立戰功歷任東烏鎮遊擊祿逆之叛崑力禦敗之次日賊大至衆

寡不敵血戰逾時體傷力竭遂血書詩一首於壁而死有淋漓鮮血透征衣報國丹心總不移之句

妻張氏聞變手刃二女同
妾自殺止遺三歲孤子

馬秉倫

陝西寧夏人任東烏鎮遊擊
祿逆之叛挺身擊賊歿於陣

楊天堦

開化人任東烏鎮右營守備同劉崑拒賊
于阿堡戶後以救護總兵劉起元陣亡

李發早

昆明人武舉任東烏鎮中營千總同劉崑
拒賊于鐵爐山小天底隨救劉起元陣亡

邵士奇

陝西人任東烏鎮千總駐防魯甸聞祿逆之
變即調土兵協官兵赴郡救援土兵與逆夷

通羣起圍之士奇
力戰不支跳巖死

馮志英

昆明人任鎮雄營把總奉調赴烏考驗值
祿逆叛同劉崑拒賊隨救劉起元陣亡

周世美

籍貫未詳任東烏鎮右營把總
隨馬秉倫忿激殺賊歿於陣

張必弘

威寧人東烏鎮左營把總祿逆之變護守鎮署賊攻圍勢急出署衝殺陣亡

王國卿

尋甸人魯甸外委把總隨千總邵士奇赴援力戰不支跳巖死以上五人俱

題請

賜祭葬贈廕賞卹有差

普洱府

本朝

章倫

浙江紹興人試用州同雍正十年委辦攸樂城工事竣回至慢蚌村值猓夷叛被圍倫正

坐罵賊

遂被害

陳天申

湖廣武陵人普洱鎮把總猓賊叛戰於通關哨死之以上二人事聞

賜祭葬贈廕賞

卹有差

大理府

明

蕭時顯

崇禎間任府同知加意民瘼留心政治任滿因道阻寄寓大理沙賊破城自縊

段見錦

任府教授沙賊陷城死於學宮

魏崇治

任府司獄沙賊陷城死之

楊明勝

任府經歷沙賊陷城同子一甲死之

王士傑

任太和縣丞有治才沙逆圍城盡心捍禦死於城上以上五人籍貫俱未詳

楚雄府

元

董文彥

通海人天歷間任威楚路知事中慶鎮將敗
狐叛攻威楚官吏皆遜彥獨死守城陷被執

罵賊不屈賊截其耳啗之彥嚼血噴賊遂遇害事
聞賜諡莊愍歷其二子茂春為通海教諭時中為

祿豐

主簿

姚安府

明

田本

山西太原人洪武間任姚州知州行已
剛方聽斷明決夷賊自久等叛死之

永昌府

明

李朝

籍貫未詳任把總萬厯間討緬寇戰死巡撫陳用賓檄建忠義祠祀之

劉廷標

字霞起福建上杭人崇禎末任府通判署府事流寇入滇傳檄永昌廷標賦詩畢從容自

縊而死

王運開

字子調四川峽江人崇禎末任推官署金騰道流寇至滇運開與劉廷標謀守澗滄江拒

賊時迤西震動人心已散乃與廷標對酌歸即自縊死其弟運閣隨兄至永時走騰越聞兄訃同劉

廷樞赴永殯殮如常弔者哭閔曰此吾輩布帛菽粟事何哭為尋寇脅官閔走潞江至中流出手

字一行付僕曰吾兄弟豈可作兩樣人耶躍入江
死讀其字曰得我骨同吾兄合葬題曰峽江兄弟
之墓數日得屍
沙岸顏色如生

鶴慶府

明

陳敬

廣東增城人洪武十四年舉賢良官禮部郎
中左遷雲南曲靖府經歷署劍川州事鄰寇

來攻力
戰死

雲南通志卷十九